

MINE BEEN ZHA NE PXEEL JESÚS BNEE XTIIDZ ME

¡Diuzh Tiofl!

¹ ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me

² haxta gol dze ne psan me diidz pe nac ncuaane gun grë zha ne bzooblo me tsie tsienee Xtiidz me. Espíritu Sant bdeed guielbiini lo zho bien zho zha racladz me; lëe dze co ga zey me gbaa.

³ Nli psacsi miech me, beet zho me, per brieegan me. Ni par glu ganle ne nli brieegan me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

⁴ Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta guiet Espíritu Sant gdeed guielbiini lo zho zigne nacle xtiidz Pxoz me; ni biire rëb me lo zho:

⁵ —Gol soladz ganle laa naa nile lo to: nli laa Juan pchoobnis, per niab nisa; sangue to zgaa to guielbiini ne gneedz Espíritu Sant, rrieequia Espíritu co chobnis to; ni zhile gdziñ dze ne laa min co gac.

⁶ Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndion̄ no men̄ rnabey nac luu. ¿Pe niina na so luu gnabey luu, zeena cueue luu zha Israel ladznia zha Roma?

⁷ Dzigo pquiab me rēb me lo zho:

—Dios, men̄ ne nac Pxoꝝ naa, ncuaane guṅ me rieguialde to gacnan̄ tow, mese nan̄ dien̄ pa dzew, dien̄ pa horgaaw; sac mese nac men̄ ne grieelo gūna.

⁸ Sinque to, zeene laa Espíritu Sant gneedz guielbiini lo to, hor co laa to ygaa poder ne rap me, laa to csilo gnee lo grē zha Jerusalén cho nac naa; tsie to dib xtan zha Judé, dib xtan zha Samar, ni lo grēragaa miech, tsienee tow.

⁹ Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len̄ xcow co, gonḍraa zho me.

¹⁰ Laa zho bii quiawique zhan gbaa zaatne gon̄ zho biongueets me ga, tibaque zeene bdziṅ chop mgui zaatne zo zho ga, dib nquitsbiese rna xab grop mgui co;

¹¹ rēb me lo zho:

—¿Pe nacne squitaa quiawi to zhan gbaa? Zigne gon̄ to i nagon̄ zey me gbaa niina, squique guiet me gbaa gal̄ dze ne laa me guiaad stib.

¹² Blozh ga dzigo laa zho wbi guic gui co (lëë Gui Oliv ga). Zhisaque bzē zho laa zho bdziṅle Jerusalén, lalse ne rzē zho dze ne rdziiladz zho lo dziin.

¹³ Bdziṅ zho zaatne rbēz zho, bieḗ zho len̄ yu ne riaan̄ glaa; sac len̄ yu glaa co ga no zho. Ga rbēz Pedr, rbēz Ndrés, Jacob, Juan, Lip, Mazh, Bartol,

Matew, ni Jacob ne nac xingan Alfé; Simón Zelos, ni Judas menlidz Jacob.

¹⁴ Grëse zho tibaque rcaalsa zho rzodiidznie zho Dios grë zho zha bets Jesús, xniaa me Marí, ni grëraa men wnaa ne nacgrë zho.

Bzo zha ne gun dziin ne psaan Judas

¹⁵ Tib dze pcaalsa maase tib gayoo gal zho, dzigo guso Pedr bnee me lo zho, rëb me:

¹⁶ —Grëse to bets, grëse to bzian, golgacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lëë min co pquiaa rey David zeene psiaab Espíritu Santa guic me.

¹⁷ Ye Judas gocgza no, ye me nac diidz niun dziin ne nodziun no niina.

¹⁸ Ni nligaa laa ne niun me dziin co, lel been me guielntseeb pto me Jesús, ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nëzrii nëzrec bliaal len me.

¹⁹ Min co nace zeene laa grë zha Jerusalén gocnaa, dzigo bleelë zho liu co “Liu Ren”.

²⁰ Zigne rneque naa ga —rëb Pedr—, ible lo Xtiidz Dios sca zhobnee; ni lëë min co ga raquiet zaatne znu rnee:

Ible ziaandets lidz zho,
ni stib choot gbandraa zaatne bio zho.

Ni rneequew:

Zhaale zha ne guiaanne dziin ne no niun zho.

²¹⁻²² Min co nagon, ible nonguiela so tib zha ne guiaan xlugar Judas, gacgza zho no guioxobnen no ne nli brieaban Jesús. Nana sca, lo grë zha ne nacgrë no psilo bzianie no me zeene pchoobnis

Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

²³ Dzigo ble zho tib meñ ne lë José Barsabás (lëëque me ga rnee zho Just), ni stib meñ ne lë Matí.

²⁴ Blozh ga, bñab zho lo Dios, rëb zho:

—Dios, ndion no luu nac meñ ne rnabey no; ndion no luuse nac meñ ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so

²⁵ guñ dziin ne psaan Judas; sac laa Judas zeyle zaatne rieguial Judas.

²⁶ Blozhse bñab zho lo Dios, laa grop zha co bio rif. Nacne brieequia meñ ne lë Matí ga, dzigo dze cotaa laa me gocgza stsiiptib zha poxtl co.

2

Biaad Espíritu Sant

¹ Zeene goc gadz zhmal gut Jesús, lëëtaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa.

² Laa zho ndxie grë zho, tibaque zeene bio tib bi nroob zhan gbaa, zig nac zeene rrieë tib medox, haxta leñ yu ne ndxie zho ga pquiab;

³ ni brieequia nzian biini, rluw zig nac ludz miech, tibga tibga biini co blëz guic zho grëse zho.

⁴ Horco grëse zho pcaania guielbiini ne bdeed Espíritu Sant, psilo zho rnee zho grë xtiidz stib miech miñe rsiaabtaa me guic zho.

⁵ Leñ dze co nziandoo grë zha Israel ne no stib ladz beñ bdziñ Jerusalén, grë zha ne bii zienal xley Dios.

⁶ Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho

zeene bin zho laa grë zha ne pcaania guie|biini co nonee xtiidz zho, per nli rzee zdoos zho.

7-8 Rlozhd gwi zho rnee zho:

—¡Pe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne!

9-10 Nu ndxie grë meñ Part, meñ Media, meñ Elam, meñ Mesopotam, meñ Judé, meñ Capadós, meñ Pont, meñ Asia, meñ Frij, meñ Panfil, meñ Egipt, haxta grë meñ ne ziaad nëz África, delant guiedz Ciren; grë meñ Cret, meñ Arab, grë zha Israel ne ziaad nëz Roma, grë meñ Roma, zha ne zienal zhiwseed zha Israel.

11 'Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagr nroob ne ruñ Dios.

12 Grëse zho per nli rzee zdoos zho, rdzieldraa zho zha guñ zho, rnabdiidzlsa zho rnee zho:

—¿Bay pe i? ¡Ncuaane gard dziañ ne!

13 Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

Bdeed Pedr tib lban

14 Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle.

15 No bla to quianee rëb to rzuudz no, per led rzuuzd no. Griinpaale name blan ngbidz, niicle niaca zha ne riepaa nziu, niacxe goon nale laa zho gzudz.

16 Led rzuudzd no, sinque niina nagon noyac grē minē bzeet Joel padzeela (tib meṅ ne biadteed xtiidz Dios), zeēne znu rēb me:

17 Znu rnee Dios:

Zeēne wzhile runfalt gal dze co, laa naa cxel
zhiEspíritu naa zdoo grēse miech;
grē xingan zhow, grē xindzooop zhow, laa zho cteed
xtidz naa,
grē zha nguieg, nzian grē ncuaane glulo lo zho,
grē meṅgol, nzian grē ncuaane glu mcaal lo me.

18 Leṅ dze co,

grēse zha ne nguzobdiidz lo naa,
niicle mguiw, niicle wnaaw laa naa cxel
zhiEspíritu naa zdoo zho,
dzigo grēse zho cteed xtidz naa.

19 Nzian grē ncuaane gzee zdoo to glu naa zhan
gbaa,
scaque lo guidzliu, zaṅ to ren, zaṅ to bel, zaṅ to grē
goxdoo.

20 Zeēne zhile gdziṅ dze ne guiaad meṅ ne rnabey
ne,
laa lo ngbidz ycow, laa mēē gna nizhnie zig rna
ren.

Dze ne guiaad me ga,
dze co gac tib dze ne mazdraa nroob, tib dze ne
mazdraa ndzon.

21 Grēse zha ne dib zdoo gnab lo Dios yquia zdoo
me zho,
grēse zha co scaania me zho.

22 'iGrēse to, goḷquiaadiaga sca ganle! Led nanwen
to ganle Dios pxeel Jesús, meṅ Nazaret ne biaad
lo guidzliu rii, Dios bnabey been me grē milagr
nroob, been me grē ncuaane bzee zdoo to; ga blu
ganle ne nli Dios nacie me.

23 Laa zeene laa Dios bdeed diidz biab me ladznia to (sac ib̄le xtiidzle Dios naca, nan̄le me zha nac ne sca ted Jesús), laa to bnaaz me, bzobdoo to me, bnabey to gut me. Led to gon̄ bloo me ladznia grē zha ntseeb ne sca psacsi me pquiaa zho me lo cruz.

24 Per bleeban Dios me, psilaa Dios me ladznia guielgut; sac lēbd guielgut ne lēew gnabey lo me.

25 'Zeene bzeet David Jesús, znu rēb me: Men̄ ne rnabey naa, ran̄ naa tibaque quianap me naa; tibaque zo me cue naa nēz derech, ¿pe nac nadien̄ ne lega pe gac naa?

26 Gacxe waa, nley no zdoo naa, niicle ludz naaw, rleya rool̄nie naa me.

Ni gane tibliladz rac naa;

27 sac nan̄ naa niicle guet naa, ib csaand me guiaan̄ naa len̄ baa, ib gdeete me diidz xin̄ xpēel̄ naa.

Naa nac tib ngundziin lo me, ni rleynie me naa.

28 Me blu lo naa zha grieelo ygaa naa guielmban, ni tib guielbley nroob ne ygaa naa zeene laa naa gdziñ lo me.

29 'Bets, bzian, to ne nac to men̄ladz naa, gol̄gona gan̄le: led min̄e bdete pxozgol ne David bnee me nu; sac gon̄, zeene gut me güey zho güeyqueets zho me, ni haxta lo nadze laa xpāa me bii niaa.

30 Sinque min̄e bded Jesús ga bzeet me, sac gon̄ tib zha ne biadteed xtiidz Dios goc me. Gocnan̄le me ne lo xtii me grieequia Men̄ ne nacle diidz ga cxeel̄Dios, ni men̄ co sob gnabey zigne bnabey me; sac scale rēb Dios lo me, ni haxta bzeet Dios lē Dios parne glu ne yquidied me.

³¹ Dzigo zig nac zeene ranle me grëtaa minē ted Jesús, nacne bzeet me ne ib zrieeban Jesús, rëb me guiaand xcuerp Jesús zaatne rbëz grëraa menġut, niicle xindgaaw.

³² 'Jesús ga gon bzeet me, sac zig nac Jesús grop lo no bdion no bleeban Dios me,

³³ ni niina gbaa zob me cue Dios nëz derech, sac me nac men rnabey. Ni zigne nacle xtiidz Dios men ne nac Pxoż me, laa me pxeel Espiritu Sant lo no; ni niina grëse ncuaane noyañ tow, grëse ncuaane noyongaa tow, xtsiin Espiritu Santow.

³⁴ Laa naa rbire rne lo to stib ganle, led minē bdete David ga bzeet David; sac gon, zeene gut David güeysobd David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob,

³⁵ nieeda lozh gnaz naa grëse zha ne rlëe lo luu, csañ naa zho lадznia luu.”

³⁶ 'Grëse to men wladz, golġona sca ganle: Jesús gon, men ne pquiaa to lo cruz ga, lëe men co nac men ne rnabey. Dios bzo me, ni Dios pxeel me biaad me lo guidzliu.

³⁷ Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ġpe nac ncuaane dziuun no?

³⁸ Dzigo rëb Pedr lo zho:

—Tib tib to, golġsaan xquielntseeb to, golġbig lo Dios, ni none chobnis to zeena guiaanmbe to lo xtol to; scagaa ible sxeel Dios Espiritu Sant gacnie to.

³⁹ Sac psanle Jesús diidz ne ible sxeel me Espiritu Sant gacnie grëse zha ne cuedz me sëeb xnëz

me; zigtaa tow, zigtaa xpëed tow, zigtagaa grëraa menzita.

⁴⁰ Nzianraa grë ncuaane bzodiidz Pedr lo zho, ni pso me diidz lo zho csaan zho grëtaa guie|ntseeb ne run miech lo guidzliu rii.

⁴¹ Lo grë zha ne bzoobdiag grë mine pseed me zho dze co, rga zho maase tson mil; blozh ga, grëse zho brobnis, laa zho gocgrë grë zha ne rliladzle Jesús ga.

Niowse mban zho

⁴² Grëse zha ne rliladz Jesús ga, dib zdoo zho zienal zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanse Jesús diidz gun zho.

⁴³ Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

⁴⁴⁻⁴⁵ Tipse rnee zho, rdeedlsa zho ncuaane rquiuin zha ne nacgrë zho; zha ne quianie liu, tel pe grëragaa ncuaane quianie zho, haxta rto zhow, dzigo rguuiz zho dimi co lo grë zha ne guie|nd pe yquiuin.

⁴⁶ Gzataa dze rcaalsa zho len yadoo; rlozh ga, rcaalague zho lidz grë zha ne nacgrë zho row zho guietxtil zigne psan Jesús diidz ga; ine nley, ine ndooladz rbe zho grë zho rquiuin zho guie|wagw ne runlo zho,

⁴⁷ ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëeb xnëz Jesús, laa zho racnzianraa.

3

Biac tib meṇ ne nē ni

¹ Tib dze zig rbixwe ngbidza, brieē Pedr grop Juan zie zho yadoo nroob ne zob Jerusalén, sac lēē hor co nac horne rie zho yadoo riezodiidznie zho Dios.

² Gax ro yadoo co quia tib puert rnee zho Puert Ndzon, ga rzob tib zhey gol īb gacd sē, sac nēle ni me zeēne gol me. Gzobse dze, rie zha ne riezooob me ga rnab me gon lo grē zha ne rzēēb yadoo.

³ Laa dze co, zeēne gon me laa Pedr grop Juan zieded ga ne laa zho sēēb yadoo, zēēb nia me rnab me gon lo zho.

⁴ Dze rwi zho lo me, tibaque rēb Pedr:

—Lo no bui.

⁵ Dzigo blis lo me bui me lo zho, naṇ me bod no pe dimi ne gdeed zho lo me.

⁶ Wbiire bnee Pedr lo me, rēb Pedr:

—Quianied naa dimi ygad naa lo luu. Ncuaaṇe grieelose gnedz naa, laaw gnedz naa niina, jniapse por Jesús (meṇ Nazaret), laa naa rnab lo luu, niinagazh guso i zeēn bzēni!

⁷ Dzigo bzheṇ Pedr nia derech me bliso Pedr me, hor cogazh laa grop ni me ga bdaan,

⁸ laa me psilo bzē. Rley me laa me bzēēb leṇ yadoo gza me zho, lo guielbley co haxta rias me, ni roolnie me Dios.

⁹ Grē miech ne no leṇ yadoo, zeēne gon zho laa me rzēle, ni scataa rley me roolnie me Dios,

¹⁰ bzee zdoo zho; sac runbey zho me, naṇpaa zho rzēd me glo, tibaque ran zho me rzob me zaatne quia Puert Ndzon ga rnab me gon.

11 Zeene laa Pedr grop Juan brieel en yadoo nroob co, yeque me nal zhits zho ib rsaand me zho, laa zho bdzin stib nēz cho yadoo co zaatne quia tib nsaap nroob ne rnee zho zhiNsaap Salomón. Nalaque grē miech co, rlozhd gwi zho, rlozhd gzee zdoo zho.

12 Dzigo rēbchaa Pedr lo zho:

—¿Pe rac to? ¿Pe nace squitaa rzee zdoo to, squitaa rwi to lo no, zig nac zeene no bdziuunguiac men rii, zig nac zeene por nguzobdiidz no lo Dios gane brieelo psē no me?

13 Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grēraa xmengol ne, men co blu lo to niina ne nli men nroob nac Xpēed me Jesús. Lēē Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz.

14 Bdeete to diidz nlaa men ne nac men ndzon, men ne peet xtold; lel bnab to blaa tib zha ntseeb ne nzēeb ngutoo.

15 Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

16 'Ni niina men ne ran to biac nu, niapse por Jesús biac me; led runbeyle to me nanle to ganle rzēd me glo. Ne dib zdoo no riladz no Jesús, gane brieelo bnab no beenguiac Jesús me.

17 'Grēse to bets, ne nac to menladz naa, rgobey naa niicle to ni niiclegaa grē zha ne nac zhiwxtis ne, lega laa to bnabeyse bgaa Jesús beet to me, niicle to bien daque dien pe nace sca been to.

18 Laa Dios bneedz diidz been to grë guielntseeb co, sac sca goc grëse minë bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

19 'Dol nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtol to. Me gneedz guielbley lo to stib,

20 ni zbiire cxeel me Jesús lo to stib, guiaadsilaa me to.

21 Gbaa no me niina, ni ga cuëz me nieeda gal dze ne laa Dios blozh bnabey goc grëse ncuaane none gac, zigne bzeetse grë zha ne pxeel me padzeela, biadteed xtiidz me.

22 Zig nac Moisés bzeet me laa Jesús guiaad, rëb me lo grë pxoz gol ne: “Dios men ne rnabey ne, ible znabey me ne lo xtii to greequia tib men ne gac zig nac naa lo to niina. Zeene laa me guiaad, golgon xtiidz me;

23 sac zha ne gond xtiidz me, ib tedsod znitlo zho.”

24 Scaque Samuel, ni grëraa zha ne biadteed xtiidz me, grëse zho bzeetle zho grë ncuaane noyac len dze rii.

25 'Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne greequia lo xtii luu, laa naa gunlay grëse miech ne ndxie gdibdoose lo guidzliu.”

26 Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

4

Güeyzo zho zho lo wxtis

¹ Laa Pedr grop Juan bii noneeque lo grë miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrë zha saducé.

²⁻³ Zigne bdziñ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeban Dios Jesús; ni rnee zho grëse menğut, scaque grieeban zho.

⁴ Niicle ne scataa rlëe grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

⁵ Zeene biini liu co, grëse zha non, grëse zha ne rnabey lo menğuedz, laa zho pcaalsa.

⁶ Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menlidz pxoz ne rnabey ga.

⁷ Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, ¿cho rnabey to, cho pxeel to ne squi no to?

⁸ Horco laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menğuedz, grëse to ne nac to zha gol ne non xtiidz.

⁹ Telne mine rlisqui to nac ne dien zha bdziuun no men rii ne laa ni me biac,

¹⁰ golsiguiel golquiaadiaga ganle, zeena gacnan tow ni gacnan grëragaa menğuedza. Jesús gon,

men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to rangaa me laa me zo lo ne nu.

¹¹ Lëë Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëëpaa quie co nac mine rnazdziits yu.” Ni scapaa nagon bzhaac to me.

¹² Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

¹³ Zeene gon grë zha wxtis co, scataa peet dzeb nod lo Pedr grop Juan, bzee zdoo zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

¹⁴ Peet brielod nlisqui grë zha co, sac nligaa laa men ne biac ga zo lo zho ga.

¹⁵ Dzigo mazd bnabey zho brieë Pedr ley grop me Juan; laa zho biaan bzodiidz zho dien zha gun zho zho,

¹⁶ sac rien zho tib milagr nroob ga sca biac ni men co; niicle ne racladz zho yqueets zhow, per grële menquiedz bina.

¹⁷ Nacne biaan zho diidz, ctseb zho zho gbiire-draa zho cseed zho miech zhiwseed Jesús; zeena lozhd gacnan grëraa miech zha biac men co.

¹⁸ Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiire-draa to cseed to miech zhiwseed men ne rnee to Jesús ga.

¹⁹ Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no?

²⁰ Grieelod gon dziuun no mine rnee to i, sac grëse ncuaane bdzion no, grëse ncuaane bdzion-gaa no ib none gnee now, zeena gacnan grëse miecha.

²¹ Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleynie Dios, rdeed zho xquizh lo me ne been me milagr

²² beenguiac me men co, ni choole iz rac sca gacd së me.

Bnab zho lo Dios

²³ Zeene laa Pedr grop Juan bdzin lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co.

²⁴ Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuaane no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaane no.

²⁵ Padzeela zeene bdeed Espiritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacne squitaa rac grë miech ne nacd zha Israel rlëenie zho Dios?

Racladz zho gun zho ncuaane ni grieelod lo zho.

²⁶ Grëse zha non ne rnabey grë guiedz, tipse rac zho laa zho racntseeb lo Dios rlëenie zho me,

ni rlëenie zho meṅ ne bzooblo me pxeel me lo guidzliu.

²⁷ Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho meṅladz no ni grë meṅzit, tipse bnediidz zho psacsi zho Jesús, meṅ ndzon ne bzooblo luu pxeel luu biaadguṅ xtsiin luu lo guidzliu nu.

²⁸ Grëse zigne psanle luu diidz, scase been zho.

²⁹ Ni scaque niina, bui ganle zha racladz zho ctseb zho no parne peet gneedraa no; luu nac meṅ ne gocniṅ no ne nac no zha ne rdziuuṅ xtsiin luu, zeena gdzieebd no cseed no miech xtiidz luu.

³⁰ Laa no rnab lo luu, beṅguiac grë meṅ rzacnë, been grë milagr nroob, blu grë ncuaane gzee zdoo miech; zeena gan zho ganle meṅ nroob, meṅ ndzon nac Xpëed luu Jesús.

³¹ Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guielbiini ne bdeed Espíritu Sant lo zho; peet rdziebdraa zho laa zho zieseend miech Xtiidz Dios.

³² Leṅ dze co, grëse zha ne rliladzle Jesús ga, tibaque nac zho, tibaque rnee zho, tibaque nac miṅe zienie guic zho. Nod zha ne guiab lose zho yquiin ncuaane rap zho; sinque grëse ncuaane quianie zho cheṅ grë zho naca.

³³ Grë zha poxtl co, zeene rseed zho miech zha brieaban Jesús, nzian zha ne rliladz me; rlupaa ne Dios nacie zho.

³⁴⁻³⁵ Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow

dzigo rdeed zho dimi co rguiz grë zha poxtla lo zha ne rquiina.

³⁶ Sca been tib meñ ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.)

³⁷ Pto me tib lë liuñ me, dzigo bdeed me dimi co lo zha poxtl, bdiiz zhow.

5

Znu bzhaac Ananí grop Safir

¹⁻² Tib mgui lë Ananí, laa tsiel me lë Safir; ye me pto tib lë liuñ me. Goñlo tsiel me, teļ palal dimi ne bdo liu co, bzhenğa me zhisa. Zeene laa me ziesan miñe biaañ ga, lo poxtl, rëb me lëë grë dimi ne bdo liuñ me ga.

³ Dzigo rëbcha Pedr lo me:

—Ananí, ¿pe nacne bdeed luu diidz bzëëb menox zdoo luu? Menox i goñ noquiil luu nan luu yquidiee luu Espíritu Sant, rnee luu lëë grë dimi ne bdo liuñ luu nu.

⁴ Bien gañle cheñ luu liu co. Dimi ne bdiizh zhow, cheñ luuw, niac niuñ luuw zigne niaccladz-taa luu, ¿pe nac dzigo ne racladz luu yquidiee luu? Goñ gañle led nod noquidiee luu, Dios i gocladz luu nquidiee luu.

⁵ Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho.

⁶ Dzigo güey bla zha nguieg pchel zho ngutoo co lar, blis zho me ga laa zho ziequeets me.

⁷ Wdzeelaaque goca zeene laa tseeel me bdziñ, ni lalnu güeynied guic me ne laa tseeel me gutle.

⁸ Bnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liuñ to nu?

Pquiab wnaa co, rëb me:

—Nliw, lalgui pto now.

⁹ —¿Pa brieer pensar qui lo to grop tseeel to? —rëb Pedr—. Ne squi tipse bnee to nan to yquidie to Espíritu Sant; dol nroob i gon been to lo Dios. Laa zha ne güeyqueets tseeel luu blansole ro yu nu, ni niina gon laa zho güeyaque luu.

¹⁰ Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëeb len yu, laa me nixle ga; gon zho gutle me, dzigo blis zho me güey zho güeyqueets zho me cue xpaatseeel me.

¹¹ Grëse zha ne gon sca goc men co grop me, zha ne bingaaw, zigtaa zha ne rliladz Jesúsá zigtagaa grëraa miecha, per nli bdzieb zho.

¹² Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho.

¹³ Grëse miech ne rcaalsa ga, rleynie zho grë zha poxtl co, nzian zho rliladz mine rseed zho, per rbigd zho gacgrë zho zho.

¹⁴ Zigse zie dze, scase racndalraa miech ne rzëeb xnëz Jesús, mguisaaque wnaasaque laa zho rliladz me dib zdoo zho.

¹⁵ Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz

zho maase zhimlëse Pedr guiab lad grë meṅ co zeene laa Pedr ted.

¹⁶ Haxta grë guiedz win ne ndxie gax Jerusalén ga, rriee grë miech rdziṅnie zho grë meṅ rza-cnë, no grë meṅ co noguitnie meṅdox; grëse zho runguiac zha poxtl co zho.

Bio grë zha poxtl ladzguiib

¹⁷ Zeene gon meṅ ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho,

¹⁸ bnabey zho bgaa zho psëëb zho zho ladzguiib stib.

¹⁹ Pcow liu co, guieela bdziṅ tib xanjl Dios pxal me ro ladzguiib, blee me zho ga; dzigo rëb me lo zho:

²⁰ —Goltsie leṅ yadoo, grëse miech ne ndxie ga golnee lo zho, zeena gacnaṅ zho zha yгаа zho guieṅmban ndzon ne nodeed Dios niina.

²¹ Biinigazh liu, silgaw laa zho bdziṅle leṅ yadoo; psilo zho laa zho noseed grëse miech ne ndxie ga.

Laga laa zho noseed miech leṅ yadoo, laa meṅ ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo meṅguiedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib.

²² Bdziṅ zho ro ladzguiib, ni tib choot guiend leṅ co; rzhitsaque wbire zho güeynie zho diidz,

²³ rëb zho:

—¡Choot guiend leṅ ladzguiib! Dziits niooga bdziṅ no, ga zo zha ne quianap; per zeene bzhal

ro ladzguiib bziaab no, bdzion no choot guiend leen co.

²⁴ Grë pxoz ne rnabey, ni men ne zo lo menguiib ne rquianap yadoo, zeene bin zhow, rdzieldraa zho zha gun zho.

²⁵ Lëëtaaque sca no zho, zeene bdzin tib zho rëb:
—Zha ne gon bloo to ladzguiib ga, laa zho no-laque len yadoo noseed zho miech.

²⁶ Lëëlëd brieen men ne zo lo grë menguiib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho.

²⁷ Zeene bdzinne zho zho lo grë zha wxtis co, dzigo rëb men ne nac pxoz nroob ga lo zho:

²⁸ —¿Pe nacne ronde to diidz? Led pso no diidz lo to csetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoł to no ne no bdziut me.

²⁹ Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no.

³⁰ Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz.

³¹ Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

³² 'Mine rnee no lo to nu diidzliw, nozhal bdziona, ni led loxaque nodsegaa; sinque ye Espíritu Sant men ne rxeel Dios racnien grë zha ne ron xtiidz me, ye men co quianee ganle ne nliw.

³³ Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

³⁴ Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo men_guiedz; dzigo guso me bnabey me brieë grë zha poxtl co nëz ley,

³⁵ bnee me lo grëraa zha ne ndxie ga, rëb me:

—Grëse to men_guiedz, laa naa rso diidz lo to, gol_cobey gon dien pe gun to zha qui. Golguien gan_le, nonguiel_da ne lega mine gacladztaa to gun to zho.

³⁶ Golsoladz gan_le, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaa_l grë zha ne gocnie me ga.

³⁷ Laa len iz ne nodop lë miech, scaque brieë-qua tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaa_l grë zha ne gocnie me; brieelodaque pe niun me.

³⁸ Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu tel_ne guicse miech biab wseed ne ziaadnie zho i, zdziñ dze ne nitlow.

³⁹ Laa tel_ne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. ¡Tel_ne guiab to gnitlo tow, nan_de to nend Dios ga tilnie to!

⁴⁰ Grëse zha wxtis co bzoobdiag zho xtiidz Gamaliel, bien zho ne scataa nonguiel_gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho

miech zhiwseed Jesús. Blozhse ga, dzigo laa zho psilaa zho.

⁴¹ Zeene laa zho wbi ga, rley zho por grëtaa miñe pteed grë zha non co zho loxaque ne rililadz zho Jesús.

⁴² Ib psaaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëe Men ne zëëble diidz cxeel Dios lo guidzliu ga nac Jesús.

6

Bzo gadz zha ne guñ xyudar poxtl

¹ Ni ne len dze co quiayac nzianraa miech ne rzëëb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuaane row zho, rgaad zho lal miñe rgaa grë wnaa viud ne nac zha Israel.

² Dzigo nacne bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:
—Gacnan to ganle, grieelodraa ne noque so dzian no dien zha ygaaz ncuaane yquiin to, sac gon nonguiel da csaan no miñe nac xtsiin no, ib none guioseedraa no miech Xtiidz Dios.

³ Miñ co nagon, mazd golzo gadz zha bgui ne gun dziin co, lëëraasi golguien cho gzo to; golguib zha ne ndzinli, zha ne nixbiini, zha ne nacie Espiritu Sant;

⁴ Zeena sca guiob lo no gzodiidznie no Dios, gnab no lo me, ni cseed no grëraa miech Xtiidz me.

⁵ Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor,

tib meṇ lë Timon, tib meṇ lë Parmen, tib meṇ lë Xteb, r̄lupaa dib zdoo me r̄liladz me Dios ni nacie Espíritu Sant me; ni tib meṇ Antioquí lë Nic, mazd glo Nic goc tib zha ne bleyniedox grë zhiwseed zha Israel.

⁶ Dzigo güeynie zho gza zha co lo zha ne nac poxtl. Blozhse bñab poxtl lo Dios gacnieṇ me zho, dzigo pxobnia poxtl guic zho, bñab zho lo Dios gdeed me guieḷbiini lo zho.

⁷ Zigse zie dze, laa Xtiidz Dios quiagaazraa dib Jerusalén. Nzian grë zha ne rzëëb xnëz Jesús, haxta grë meṇ ne nac pxoz, nzian zho laa zho bliladz me dib zdoo zho.

Bnaaz zho Xteb

⁸ Goc palal dzew, nzian grë milagr nroob ne run Xteb, sac tibaque sca dib zdoo me r̄liladz me Jesús, ni nacie Espíritu Sant me.

⁹ Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndiḷdiidznie zho Xteb. Brieaque zla zha Israel ne ziaad nëz Ciren, nëz Alejandrí, nëz Cilis, ni nëz Asia, ye zho gocgza zha co rlëë zho lo Xteb.

¹⁰ Goṇse zho rlëbd xtiidz zho lo Xteb, sac niapse Espíritu Sant rdeed guieḷbiini lo me, rien me pe rnee me lo zho;

¹¹ dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

¹² Zeeṇe bin meṅguiedza, blëë zho; nacie bn-abeyaue zha ne rnabey lo meṅguiedz bgaa Xteb güeyzo zho me lo wxtis.

¹³ Ni güeynie zho bla zha ne lega bnexuu, rëb zho:

—Nliw, rtsidil̄ mgui qui xyadoo ne, rtsidil̄ me xley ne.

¹⁴ Bdzion̄paa no goṅ quianee me laa Jesús meṅ Nazaret ne quiazeet zho dib i ctsil̄ yadoo rii, ni ctsëë me ley ne psan̄ Moisés lo xmeṅgol ne.

¹⁵ Horco zeene laa grë zha wx̄tis co ni grëraa zha ne ndxie ga bui lo Xteb, goṅ zho tib biini nroob ne riab lo me, masaque rlu me zig rlu tib xanj̄l Dios.

7

¹ Dzigo bnabdiidz meṅ ne nac pxoz nroob ga lo Xteb, rëb me:

—¿Bnë dien̄ pe nli quiayun̄ luu grë ncuane rnee zho i?

² —Grëse to ne nac to meṅladz naa —rëb Xteb—, laa naa rzaac to zig bets naa, zig pxozgaa naa. Gols̄iguiel̄ gol̄quiaadiag chop tson̄ lan diidz ne gne naa lo to nu gan̄le: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb Dios

³ grieë me ga, csaṅ me grë meṅlidz me, tsie me nëz ne glutaa Dios lo me.

⁴ 'Nacne brieë me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina.

⁵ Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaaṅniew. ¡Ni laa me quianied meed̄ len̄ dze co!

⁶ Rëbgazh Dios lo me, ib zieban grë zha xpëed me ga ladz beṅ dipse len̄ tap gayoo iz, ga csacsi miech zho guṅcuṅ zho zho dziin.

7 “Per ib tedsod sacsi naa zha ne csacsi zho ga”, rëb Dios, “ni ga greee zho glanso zho nu, nu goolnie zho naa.”

8 'Ni parne glu ib zac mine bnee Dios lo Abraham ga, dzigo psan me diidz grëse mëëdbgui ne greeequia lo xtii Abraham none tso tib bey lad zho. Min co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëe gza tsiipchop zha co nagon goc pxozgol ne.

9 'Ziese pxozgol ne ga, blëenie zho bets zho zha ne lë José, pto zho José lo men ne zie wto nëz Egipt. Ni ne nacie Dios José,

10 psilaa me José lo grëtaa guielne ne bded José, ni gocnien me José beenbey rey Egipt José. Ib psaaand me José, bdeed me guielbiini lo José. Zeene gon rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grë ncuaan non ne no lidz rey, me bnabeya.

11 Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaan mban bded miech. Grë zha ne goc pxozgol ne ga, guienndraa pe gow zho.

12 Laa zeene bin Jacob laa zhobxtil bii no Egipt, dzigo pxeel me zho güeyxi zho zhob ga.

13 'Zeene goc chop vuelt ziexi zho zhob Egipt, dzigora gocnan zho bets zho ga rnabey Egipt; niiclegaa rey cow, hor coraa beenbey me bets José.

14 Dzigo bnabey José güeyxi zho pxoz me Canaan, güeyxi zho tseeel zho, güeyxi zho xpëed zho. Lo grë zho rgaa zho tsongal tsiin, laa zho bdzin Egipt.

15-16 'Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grë xpëed me zha ne goc pxozgol ne ga, ga gut zho.

17 Grë zha ne brieequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo,

18 laa men ne nac rey Egipt len dze co, psilo ptsidil zho; sac rsoladzdraa me grëtaa dziin ne been José lo menladz me.

19 Psacsi me zho, been me zho zigne gocladztaa me, haxta bnabey me grëse mëëdbgui ne ral gandraa zho win parne guet win.

20 'Len dze copaa nagon gol Moisés, tib mëed niow nac win. Tson mëë bloolan xniala win win,

21 laa zeene brieelodraa ngolan me win, dzigo güeysan me win tib ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me;

22 haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuane gungaa wina.

23 'Choo iz rap Moisés, zeene biab guic me güeyted me lo menladz me.

24 Dzigo gon me laa tib zha Egipt quiaguin tib zha Israel; nacne bzëëbaque me bla me zho, beet me zha Egipt co.

25 'Sca been Moisés, nan me nien grë zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw.

26 Biini liu co, goṇ me laa chop zha Israel nodiḷ, zie me nla me lo xtiḷ zho, bnee me lo zho nonguield ga tiḷ zho, guieṇ zho ganle menladzaque zho.

27 Dzigo biasaque tib zha ne noquiaaw ga pcheep zho me, ntseebrac zho rëb zho lo me: “¿Cho bzo luu guiaadnabey luu no, guiaadlisquigaa luu dieṇ pe nodziuuṇ no?”

28 ¿Te racladz luu ye gutaque luu no zigne beet luu zha Egipt co nieeg?”

29 'Zeene bin Moisés sca rëb zha co, hor co bzhooṇ me bey me nëz xtan zha Madián. Nëz co ptsieelnia me, ga gop tsieel me chop mëëdbgui.

30 'Choo iz goc no me nëz xtan zha Madián, tib dze no me cho gui Sinaí, tibaque zeene goṇ me laa tib anjḷ zo groḷtaa tib lo yag zarz, masaque rso bel lo yag co.

31 Bzee zdoo me, lëëtaque laa me zie gbiggax me, zeene bin me tsi Dios rëb Dios lo me:

32 “Naa nac Dios ne bliladz pxozgol luu Abraham, pxozgol luu Isaac, pxozgol luu Jacob.”

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me.

33 Dzigo bnee Dios stib, rëb me lo me: “Blit lab luu, sac gax lo naa i zo luu.

34 Laa dze nagoṇ bdziṇ ne laa naa csilaa grë zha Israel ladznia zha Egipt; sac ran naa zha nactaa grë guieḷnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga.”

35 'Dzigo laa Dios pxeel Moisés ziesilaa me zha Israel; niicle ne glo rëb zho lo me: “¿Cho bzo luu guiaadnabey luu no, guiaadlisquigaa luu dieṇ pe

nodziuun no?” Per me bzo Dios bnabey lo zho, blee me zho Egipt.

³⁶ 'Nzian grë milagr, nzian grë ncuaane nroob ne gzee zdoo ne been Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grë dan bidz ne bio zho dipse len choo iz ne bzënie me zho ga.

³⁷ 'Moisés ga bzeet lo pxozgol ne, ne laa Dios gnabey lo xtiique zho grieequia tib men ne cxeel me guiadteed xtiidz me, zigne pxeel me Moisés.

³⁸ 'Zeene nonie Moisés zho grë dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban.

³⁹ Per ib bind zho xtiidz me, lel gocladz zho mbiire ney zho Egipt stib,

⁴⁰ bnabey zho Aarón rëb zho: “Bzaa tib mdio tedner lo no gacnieñ no laa no guioo Egipt stib; sac loxaque biadbee Moisés no ga, na choot nand dien yo Moisés.”

⁴¹ 'Dzigo bzaa zho tib ngon yeen goc zhimdio zho, haxta beet zho grë ma ne bloogon zho lo mdio co; bleynie zho ncuaane bzaania zho.

⁴² Nacne wbinladz Dios, psaan me zho; psilo zho bleynie zho grë ncuaane ran zho zhan gbaa. Been zho zigne bzeetse zha ne biadteed xtiidz me padzeela, zeene rëb zho:

Golsoladz ganle,

laa ne nleynie to naa dipse len choo iz ne bio to grë dan bidz co,

laa ne niut ma ne ngogon to lo naa,

⁴³ lel grë mdio ne bzaa to, mdio co bleynie to, lo mdio co pquiitsgzhib to.

Mdio ne rnee to Moloc,
 zaatne zieetaa to tibaque ney to lidza,
 zhmel mdio ne rnee to Renfán, pa csaan to ma.
 Miñcocxe waa, laa naa cuee to ladz to,
 gzonëz naa to guey to grë dan ne riaan zitraa lo
 guiedz Babiloin.

⁴⁴ 'Len dze ne sca bio pxozgol ne grë dan bidz
 co, tib yu larse goc xyadoo zho, ga biotsow quie ne
 quia xley Dios. Dioszhal blu lo Moisés zha tsaa yu
 co.

⁴⁵ Goc bla iza, zeene blozh bnitlo Dios grë guiedz
 ne brin nu glo, laa Josué blansonieque yu co.
 Haxta len dze ne goc David rey, biï lëew nac
 xyadoo zho.

⁴⁶ 'David goc tib rey ne gocnziuu lo Dios, bleyne
 Dios me, dzigo gocladz me nzaa me tib yadoo
 nroob zaatne mbëzlo zho Dios.

⁴⁷ Per brieelod nzaa mew, Salomónraa goc rey ne
 bzaaw.

⁴⁸ Nli laa yadoo co biaa, per tel Dios, men nroob
 nac me, led yed me cuëz len grë yu ne rzaa miech.

⁴⁹ Zigne zhobneeque lo Xtiidz me, zeene znu rëb
 me:

Gbaa nac zaatne zoob naa,
 laa lo guidzliu nac zaatne rzo ni naa.

¿Zha nadien nac yu ne nan to gzaa to cuëz naa?

¿Pa nadien guiab to gzaa to zaatne gdziiladz naa?

⁵⁰ ¿Niacxe led naad bzaa gbaa?, ¿niacxe led naad
 bzaa guidzliu?

⁵¹ 'Golgona sca ganle —rëb Xteb—, zigne
 beenaque grë pxozgol to ga padzeela, scadaaque
 gon quia yun to niina. Miech nad, miech ntseeb
 zdoo nac to; ib ronde to miñe rnee Espiritu Sant.

⁵² Tel p_xozgol to, nēl_te gōndze zho grē zha ne p_xeel_l Dios biadnee xtiidz me; haxta beet zho grē zha ne bzeet ne laa Dios cxeel_l tib men_l peet xtold ne bzooblo me guiaad lo guidzliu. Ni niina ne laa Dios p_xeel_l men_l co, scasaque been_l to, ptsidil_l to me, bnabey to bgaa me beet to me.

⁵³ Tibaque squi quia to quiaguiits to Xley Dios; xanjlpaa me biaadsaṅa lo to, ni runde to miṅe rnabeya.

Beet zho Xteb

⁵⁴ Zeene bin zho sca rēb Xteb, blēeye zho haxta rowye ro zho rwi zho lo me.

⁵⁵ Laa me, ne nacie Espíritu Sant me, zeene blis lo me bui me nēz gbaa, goṅ me lo guiel_lndzon ne no Dios, goṅpaa me laa Jesús zo cue Dios nēz derech.

⁵⁶ Dzigo bnee me, rēb me:

—Raṅpaa naa niina goṅ nzhialse gbaa, laa men_l ne p_xeel_l Dios biaad lo guidzliu ga, laa me zo cue Dios.

⁵⁷ Miṅe been_l zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz.

⁵⁸ Zha ne goc textigw ga, blee zho lar ne mbix zho, bdziin_l zhow tib lo mgui nguieg lē Saul, mgui co p_quianapa; laa zho psilo bdeedquie me.

⁵⁹ Sca nodeedquie zho me, laa me rnab lo Dios rnee me:

—Jesús, luu ne nac luu men_l ne rnabey, luu pcaania zhiespíritu naa.

⁶⁰ Dzigo p_quiitsgzhib me, ni p_quiaa me stib redz nroob bnab me lo Dios, rēb me:

—Dios, luu ne nac luu meṇ ne rnabey, doḷ ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lē Saul ga, bdeed diidz sca beet zho me.

8

¹⁻² Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquiēnē me.

Leṇ dze co, psilo zha ne sca rlēēnie zha ne riladz Jesús, ptsidil zho grēse zha ne riladz me; dipse leṇ guiedz Jerusalén pquianaḷ zho zho. Grēse zho bzhoon, zha ne zie grēraa guiedz ne ndxie nēz Judé ga, zha ne zieegaa nēz Samar; loxaque zha ne nace poxtl biaan Jerusalén.

³ Ntseeb rac Saul, rzac me tebaa zha gnitlogazh me grēse zha ne riladz Jesús. Stib yu stib yu zie me, riebezho me zho lidz zho, mgui wnaasaque rey me riesēēb me zho ladzguiib.

Bdziṇ Xtiidz Jesús nēz Samar

⁴ Laa grē zha ne bzhoon Jerusalén ga, zaatne zieetaa zho rnee zho Xtiidz Jesús lo miech.

⁵ Zig nac Lip, zeēne bdziṇ me tib guiedz nēz Samar, psilo me bnee me Xtiidz Jesús lo grē miech co.

⁶ Ndal zho rquiaadiag miṇe rnee me, rzee zdo zho ran zho grētaa milagr ne run me.

⁷ Ndal grē zha ne noguitnie mēdox, riac zho, rquiaadan grē mēdox co redz zeēne laa ma rzhoon; grē zha ne gutoo, grē zha ne nde ni, runguiac me zho.

⁸ Grēse miech ne no guiedz co, rley zho.

9-11 Ga no tib meṇ ne rooḷ diidz dox, lë Simón. Ye me rzee zdoo miech grë ncuaane ruṇ me. Nzianle iz sca noquidie me zho, grëse meṅguiedz ruṇbey me, haxta niats rac me rnee me guiendraa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

12 Laa zeene bnee Lip lo grë miech co gocnaṇ zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis.

13 Dzigo yeque meṇ ne lë Simón ga bliladz Jesús, ye me laa me brobnis; zaatne zieetaa Lip naḷ me zhits Lip, rzee zdoo me raṇ me grëtaa milagr nroob ne ruṇ Dios.

14 Grë zha poxtl ne no Jerusalén, zeene gocnaṇ zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nêz co.

15 Laa zho zie gnab zho lo Dios ygaa grë zha ne bliladzle Jesús ga guielbiini chen Espíritu Sant;

16 sac zeene bliladz zho Jesús, loxaque brobnisse zho, gard ygaa zho guielbiini co.

17 Bdziṇ zho pxobnia zho guic grë meṇ co, bnab zho lo Dios; dzigo grëse meṇ co laa me bgaa guielbiini ne rdeed Espíritu Sant.

18 Zeene goṇ meṇ ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi,

19 rëb me:

—Goḷneedz poder qui lo naa; zeena ye naa zha ne cxobniataa naa guic ygaa zho guielbiini ne rdeed Espíritu Sant.

20 Pquiab Pedr rëb Pedr lo me:

— ¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grē xtimi luu i!

²¹ Ni lalnu rieguald luu gun luu dziin rii, ni gdziindgaa dze gun luuw; sac mbed zdoos luu, zienied guic luu gun luu miñe rnabey Dios.

²² Blee zhgab yozh qui guic luu, bnab lo Dios zeena togo squia zdoos me luu, gunquizhd me luu dol ne squi bza zdoos luu i;

²³ sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

²⁴ Pquiabse me rëb me:

— Golgun guielnzaac, golnab lo Dios yquia zdoos me naa, zeena ygaad naa grē guielnedox ne rnee to i.

²⁵ Blozhse bzodiidznie Juan grē miech co grop me Pedr, blozhse pseed zho zho Xtiidz Dios, laa zho wbire zey zho Jerusalén tib. Guiedz ne rdetaa zho dib xtan zha Samar ga, rnee zho Xtiidz Dios lo grē miech co.

Bzodiidznie Lip tib meñ Etiopí

²⁶ Laa Lip no Samar ga, tib dze brieequia tib xanjl Dios lo Lip, rëb me tsie Lip nëz ne rrieer Jerusalén zie nëz Gaza.

²⁷ Dzigo güey Lip nëz co. Tib dan ngana, lëëtaque laa tib meñ ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí.

²⁸ Zobse me tib leñ carret nroob zie me ga; znu wbirele me Jerusalén güeygan me Dios. Laa me zob leen co quialab me lo Xtiidz Dios miñe pquiaa Isá, meñ ne biadteed xtiidz Dios padzeela.

²⁹ Dzigo bnabey Espíritu Sant Lip tsie Lip yгаа carret co lo Lip.

³⁰ Zeene bgaa carret co lo Lip, bin Lip pa lo nolab men co; nacne rëbchaа Lip lo me:

—¿Pe rien luu cho raquiet zaatne nolab luu i?

³¹ —Rienđ naaw —rëb me—, rquiuñ tib zha ne gnë lo naa dien zha naca.

Dzigo bredz me Lip biep Lip len carret co, güeysob Lip cue me.

³² Znu rnee zaatne nolab me ga:

Zigne racse mëcwxiił yeen zeene rnaaz zho ma rut zho ma,

scadaa ndooladz goc me,

peet beend me zeene laa zho zienie me.

Ni zigne roptsied ma zeene rtsiib zho ma, scaque ni tib diidz ptsired me lo zho.

³³ Niicle ne goñ zho scataa ndooladz me, per psacsi zho me.

¡Pa lotaa bdziñ guiełntseeb ne been gre menładz me!

Sac goñ, ptiche zho xquiełmban me lo guidzliu.

³⁴ Dzigo rëbchaа men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded miñ rii, te stib zhow ye?

³⁵ Dzigo rëb Lip lo me Jesús raquiet ga, ni bnee Lip grëraа miñe nac zhiwseed Jesús.

³⁶ Laa zho no nëz, tibaque zeene bdziñ zho tib lugar co no nis; rëbchaа me lo Lip:

—¡Bui ganle laa nis no nu! Mazd bzhiguiel pchoobnisgagh naa.

³⁷ [—Zaca —rëb Lip—, totsaque dib zdoo luu rilıadz luu Jesús.

—Rliladz naa me —rëb meṇ co—, rliladz naa ne nli Xpëed Dios nac me.]

³⁸ Dzigo bnabey me blëz carret co ga. Biet me leen co grop me Lip bzëëb zho lo nis co, ga pchoobnis Lip me.

³⁹ Blozhse ga, laa Espíritu Sant blis Lip gonḁdraa me Lip; per rley me laa me bio nëz stib, laa me zie.

⁴⁰ Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdziṇ me guiedz Cesarea.

9

Goṇ Saul Jesús

¹ Laa mguì ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús. Güey me lo meṇ ne nac pxoz nroob,

² bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguiib Jerusalén.

³ Laa Saul bio nëz, laa Saul zie. Zhile gdziṇ me guiedz Damasc, tibaque zeene brieequia ti biinidoo zhan gbaa biab zaatne zie me ga. Groḁtaa lo biinidoo co biaan me, biabgazh me liu.

⁴ Liu nix me, bin me zëëb ti tsi meṇ co rnee lo me: —Saul, Saul, ¿pe nacne quianaḁ luu naa?

⁵ —Been guielḁzaac —rëb me—, bnë dieṇ cho luu. Dzigo pquiab meṇ co, rëb me:

—Naa nac Jesús meṇ ne squi quiatsidiḁ luu. [Lëëque luu goṇ nosacsi luu i, rzac luu zigne rzac

ngon ne rcaan_{ni}, ni lëëque lo guuib lots ne rtseb zho ma riecaan_{ni} ma.

⁶ Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu gon naa niina?]

Rëbchaa Jesús lo me:

—Guche i, güey Damasc, ga gnë zho ganle pe nac miñe no gon luu.

⁷ Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zëëb, per choot ranð zho.

⁸ Laa Saul guche ga. Zeene laa me pxal lo me gwi me ranðraa me, ¡laa lo me pcowle! Zha ne ziegzale me ga bzheñ nia me bdziñ me Damasc.

⁹ Tson dze sca brielod nian me, gzase dze co dowd me, niicle peet god me.

¹⁰ Guiedz Damasc ga, ga no ti mgui ne rliladz Jesús lë Ananí; dzigo gon me Jesús, bredz Jesús me. Pquiab me,

¹¹ dzigo rëbchaa Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz meñ Tars ne lë Saul. Zeene quiazodiidznie me naa,

¹² blu naa lo me laa tib zha lë Ananí bdziñ rxobnia guic me, zeeña gbiire gan me stib.

¹³ Pquiab Ananí rëb Ananí:

—¿Saul ye? Ziyon naa name zha nac grëtaa ncuaane noyun me Jerusalén, notsidil me grë zha ne rliladz luu.

¹⁴ Haxta pxoz nroob ne rnabey bdeed diidzbey gnaaz me grëse zha ne no nëz rii.

¹⁵ —Güey —rëb Jesús lo Ananí—, sac laa naa bzooblöle me, ib me tsie grë guiedz zit tsieseed me

miech xtidz naa, me gneew lo grë zha rnabey, ni lo grëgaa zha Israel.

¹⁶ Na naa glu lo me ganle zha nac grë guielnë ne gan me, zeene laa me quiayunle xtsin naa.

¹⁷ Dzigoraa güey Ananí zaatne no Saul ga. Bdzin me, pxobnia me guic Saul, rëb me lo Saul:

—Saul, bina ganle bets, laa Jesús gon, men ne rnabey, men ne brieequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guielbiini ne rneedz Espíritu Sant.

¹⁸ Zigne sca bnee Ananí, laa lo Saul biacgazh; lega zigne nac xmed mel nac grë ncuaan co briece lo me. Horcogazh laa me brobnis.

¹⁹ Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne rliladz Jesús Damasc ga, dzigo briece me

²⁰ güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

²¹ Rzee zdoo grëse miech co ran zho sca rnee me, rneechaa zho:

—¿Led lëe men qui ga name scataa ntseeb rac Jerusalén, notsidil me grë zha ne rliladz Jesús? Conque nac diidz min co ziaad me nu, ziadnaaz me zho tsiesan me zho lo grë pxoz ne rnabey.

²² Per zigse zie dze, mazdraa rac Saul tibaque ne rnee me lo grë miech co, lëe men ne zëëble diidz cxeel Dios lo guidzliu ga, nac Jesús. Grë zha Israel ne no ga, rienndraa zho dien pe gliladz zho.

²³ Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me.

24 Dze guieel riesobnap zho gzaase zaatne rap biedz nroob ne ndze igo guiedz co n̄z, riequiamb̄z zho ted me, gut zho me. Per gocnañ mew,

25 nace goḷ ti pcow liu pcaalsa gr̄e zha ne bliladz miñe bnee me, bloo zho me ti leñ chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

Bdziñ Saul Jerusalén

26 Zeene bdziñ Saul Jerusalén gocladz me ndziñ me lo gr̄e zha ne rliladz Jesús ga, per leñ bdzieb zho zeene goñ zho me, sac rliladz d zho ne nli yele me bz̄eēb xn̄z Jesús.

27 Dzigo güeynie Bernabé me lo gr̄e zha ne nac poxtl, bzodiidz Bernabé lo zho zha goñ me Jesús zeene no me n̄z zie me Damasc, zha r̄eb Jesús lo me; ni zha bdziebd me bnee me lo gr̄e miech cho nac Jesús, leñ dze ne bl̄z me Damasc.

28 Dzigoraa pcaania zho me. Laa zho gocgza me, zaatne zietaa zho zieseēd zho miech, ib rdziebd me rnee me cho nac Jesús.

29 Brieequia bla zha Israel ne rnee xtiidz zha Gres bd̄ildiidznie zho me. Zhisaque goca, laa zho gocladz niut zho me.

30 Zeene gocnañ gr̄e zha ne rliladz Jesús gaw, dzigo güeysañ zho me guiedz Cesarea; ga brie me laa me zie n̄z Tars, zaatne nac ladz me.

31 Leñ dze co, gr̄ese miech ne no xn̄z Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guiełxtseeb nodraa zho; zigse zie dze rioguicraa zho zha nac Xtiidz Dios. Gr̄ese zho rioxco zho mban zho zigne

rnabey me, tibaque nacie Espíritu Sant zho. Ni scagaa, zigse zie dze ndal grë miech ne rzëëbraa rcaania Xtiidz Dios.

Rieted Pedr lo grë zha ne rliladz Jesús

³² Leñ ngbidz coque, zie ziaad Pedr rieted me lo grëse zha ne rliladz Jesús. Nacne güeyted me lo grë zha ne no Lida.

³³ Guiedz co, beenbey me ti mgui lë Ené, gocle xon iz nix mgui co, ib gacd së me sac dipse me gutoo.

³⁴ Dzigo rëbchaa Pedr lo me:

—¡Ené, niinagazh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga.

³⁵ Grëse men Lida, grëse men Sarón zeene gon zho sca biac men co, grëse zho bliladz Jesús.

³⁶ Gaxaque Lida riaan ti guiedz lë Jop. Jop ga no ti wnaa ne rliladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquiin, run me xyudar zho.

³⁷ Lega nacle blanguidz me, laa me gut.

Zha ne rliladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti leñ yu ne riaan nöz glaa. Xco co no zho,

³⁸ zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

³⁹ Zigne bdziñnie zha co diidz, zienalgazh Pedr zhits zho. Bdziñ zho lidz men co, zolinöz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me.

⁴⁰ Dzigo bnabey Pedr brieē zho ley grēse zho, laa me bīaān ga, pquitsgzhīb me bnab me lo Dios. Blozhse ga wbig me lo ngutoo co, bnee me lo me rēb me:

—Guche i, Tabit.

Zigne sca rēb Pedr laa lo ngutoo co bzħial, zeēne goñ me laa Pedr zo ga, laa me bzobli.

⁴¹ Bzħeñ Pedr nīa me, blīso Pedr me, dzigo bredz Pedr grē zha ne rliladz Jesús ga, nī grē wnaa viud co; goñ zho laa me brieēbanle.

⁴² Dipse lad guiedz co bzħoob diidz sca brieēban wnaa co; grē zha ne bīna, ndal zho bliladz Jesús dib zdoo zho.

⁴³ Nzianlaa dze bīaān Pedr ga, blēz me lidz Simón ti meñ ne rcuudz grē guid ma.

10

Güeyzodiidznie Pedr Cornel

¹ Guiedz Cesarea, ga no ti meñ lē Cornel, rnabey me lo ti partid menguiib lē partid Italian.

² Zigtaa mew, zigtaa grē meñlidz mew, dib zdoo zho rliladz zho Dios, noxco zho mban zho zigne racladz Dios. Tibaque nonab zho lo Dios, nī nroob ncuaañe rgad zho lo grē zha ne guiēñ pe yquiin.

³ Tib dze, bdzele dzew tibaque zeēne goñ me laa ti xanjl Dios bdziñ zaatne zo me, bredzlē anjl co me.

⁴ Dze rwi me lo anjl co, rdzieb me laa me pquiab. Dzigo rēbħaa anjl co lo me:

—Gocnañ ganle grēse miñe rnab luu lo Dios ron mew, nī ran me grētaa yudar ne squi quiayun luu lo grē zha ne guiēñ pe yquiin.

⁵ Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lē Simón Pedr.

⁶ Gax zaatne nac ro nisdoo, ga no ti men lēque Simón, rcuudz me grē guid ma; lidz men co ga rbēz me; ga tsieguib zho me.

⁷ Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrē zhaguiib ne zopaa gax lo me; dib zdo zhaguiib co rliladz zho Dios.

⁸ Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

⁹⁻¹⁰ Biini liu, zig rwe ngbidza gaxle Jop zie zho. Lēetaaque hor co laa Pedr biep nēz glaa guic yu ne rbēz me ga. Rcaabedz me, dzigo laga noyaclo ncuaane gow me laa me biep guic yu co ziezodidznie me Dios.

¹¹ Dios nozodiidznie me, tibaque zeene gon me laa ti lar nroob ziad-zēeb zhan gbaa, nzhidoo gzatap nēza laaw bdziñ lo me.

¹² Grē lose ma no lo lar co, ga no ma ne rzē gza tap ni, no grē ma ne rzē zigne rzē meel, ni no grē ma ne rsiibe.

¹³ Horco bin me ti tsi men co, rēb lo me:

—Pedr, ma ne racladztaa luu gow luu zac gut luu ma.

¹⁴ Pquiab me rēb me:

—iMiñ cogaa nagon grieelod! Wlaltaa gard gow naa grē ma beed qui.

¹⁵ Rēbchaa men co lo Pedr:

—Grē ncuaane beenlayle Dios, nodne gnee luuw ncuaan beed.

16 Blulo lar co tib, bluloquew stib, laa zeene biontaa gon mew dzigo laaw biire bzoquia nēz gbaa.

17 Lēētaaque laa Pedr no zhgab dien pe nacne sca gon me lar co, laa zha ne pxeel Cornel ga bdziñ ro yu ne rbēz me ga,

18 rnabdiidz zho me.

19 Zhgab co no Pedr, zeene rēb Espiritu Sant lo Pedr:

—Laa tson zha bgui gon ziaadguib luu.

20 Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

21 Dzigo laa Pedr biet ga, bdziñ me lo zha ne pxeel Cornel ga, rēb me lo zho:

—Naa nac Simón Pedr. ¿Pe nac mandad ne ziaad to?

22 Pquiab zho rēb zho:

—Laa no ziaad xmandad Cornel, ti men ne rnabey lo menquiib Cesarea. Laa me pxeel no ziaad-xi no luu, sac ti xanj Dios rēb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grēse zha Israel rleynie zho me.

23 Dzigo bredz Pedr zho bded zho nēz len yu; ga biaan zho wdze co. Biiniraa liu zienie zho me, ye palal zha Jop, zha ne rliladz Jesús zienal zhits me.

24 Dze ne rac chop ngbidz brie zho Jop, laa zho bdziñ Cesarea. Laa Cornel bredzle grē menlidz me, grē zha ne ndzieeldiiz me; ndal nac zha ne ndxienie me lidz me, quiambēz me Pedr.

25 Zeene laa Pedr bdziñ, brie me güeydzieelo me Pedr, pquiitsgzhib me lo Pedr nan me niun me Pedr zigne riegañ me Dios.

26 Dzigo bliso Pedr me, rëb Pedr lo me:

—¡Guso i, nodne yquitsgzhìb luu lo naa! Bien ganle samiechaque luu nac naa.

27 Dzigo laa menguiib co guso ga. Nozodiidz zho laa zho bzëëb len yu. Zeene bdziñ zho zaatne ndxie grë miech co,

28 psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho.

29 Gacxe waa, zigne gocnan naa laa to rbedz naa, zialnalgazh naa zhìts zha ne pxeel to. Nana sca, golnë dien pe nacne bredz to naa.

30 Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me,

31 në me: “Gocnan ganle grëse miñe rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin.

32 Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.”

33 Sca nagon në men co lo naa, nacne bnabey naa biaad-xi zho luu; ni xquizhgaa luu ne laa luu ziaad. Dios zobwi ganle, grëse no laa no ndxie nu par yquiaadiag no miñe bnabey me luu gnë luu lo no.

34 Dzigo rëbchaa Pedr:

—¡Naraa rien naa, led yed Dios cue miech dien cho nac zha Israel, cho nacгаа zha zit!

35 Sinque grëse miech lo guidzliu, tel pa guiedz-taa nac zho, rcaania me zho totsaque ron zho mine rnabey me, ni rioxco zho zaacse rban zho.

36-37 Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuaane no). Zig nac dib Judé, desde ne psilo Juan pseed me miech Galilé, laa zho gocnaa.

38 Ni nanaxe to ganle, bdeed Dios poder lo Jesús, pxeel me Espíritu Sant gocnie Jesús. Zaatne bded-taa Jesús, pquia zdoo me miech, grë zha ne nosacsi mendox psilaa me zho ladznia ma; sacne nli Dios nacie me.

39 No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz,

40 per zeene goc tson ngbidza laa Dios bleeban me, ni bneedz Dios diidz biire bdzian no me.

41 Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdioownie no me, bdionie no me,

42 ni pxeel me no gnee no lo miech gacnan zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana.

43 Me ga bzeet grë zha ne biadteed Xtiidz Dios

lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

⁴⁴ Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espíritu Sant lo zho.

⁴⁵⁻⁴⁶ Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guielbiini ne rdeed Espíritu Sant.

⁴⁷ Dzigo rëbchaa Pedr:

—¿Peraa nadien gbiaaz ne, ne cchoobnisgazhd ne zha rii? Laa ne bdzianle ganle zigne rdeed Espíritu Sant guielbiini lo zha Israel, scaque bdeed me guielbiini lo zho.

⁴⁸ Dzigo bnabey Pedr brobnis zho, laa zho bzëëb xnëz Jesús.

Blozh ga bnee Cornel lo Pedr cuëz me ga ti bla dze.

11

Bzodiidz Pedr zha güey me lidz Cornel

¹ Grë zha poxtl ne no Jerusalén, ni grëraa zha ne rililadzle Jesús zha ne no Judé, bin zho sca bliladz gza menzit co Xtiidz Dios.

² Dzigo zeene laa Pedr bdziñ Jerusalén güey bla zho güeytildiidznie zho Pedr,

³ blisqui zho lo Pedr pe nacne güey Pedr lidz menzit, pe nacne güeytownie Pedr zho.

⁴ Dzigo psilo Pedr bzodiidz me lo zho zha nacne güey me lidz men co, rëb me:

⁵ —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti

lar nroob ziad-zëeb zhan gbaa, nzhidoo gzatap squina laaw ziaad nëz lo naa.

⁶ Zeene bdixlo naa bui naa dieṅ pe quia lo lar co, goṅ naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe.

⁷ Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.”

⁸ Dzigo pquiab naa rep naa: “Miṅ cogaa nagon grieelod, wlaltaa gard gow naa grë ma beed qui.”

⁹ Nëchaa me lo naa: “Grë ncuaane beenlayle Dios, nodne gnee luuw ncuaan beed.”

¹⁰ Tson vuilt sca goṅ naa lar co. Blulow tib, bluloquew stib, zeene biontaa goṅ naaw dzigo laaw biire zey gbaa.

¹¹ Loxaque blozh goṅ naa lar co, laa tson zha bgui blanso ro lidz meṅ ne blëz naa ga, pxeel meṅ Cesarea co zho ziaadguib zho naa.

¹² Ni laa Espíritu Sant bneeque lo naa, no ganal naa zhits zho, niicle ne zhazit nac zho; nacne bialal naa. Ye gza xoop zha ne zialnie naa nu bzë bio no.

¹³ Bdziṅ no lidz meṅ co, psilo me bzodiidz me lo no zha bzhaac me, në me leṅ yu no me, zeene goṅ me ti xanjl Dios, rëb anjl co lo me cxeel me bla zha ne tsie Jop tsixi zho naa

¹⁴ zeena gane naa lo me zha grieeo csilaa Dios me lo doḷ grë meṅlidz me.

¹⁵ Laa naa psilo quiane lo me grë meṅlidz me, zeene grëse zho laa zho pcaania Espíritu Sant, ni bgaa zho grë guielbiini ne rdeed me zigne bgaaque new.

16 Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zgaa to guielbiini ne rneedz Espíritu Sant.”

17 Sca nagon pcaania zho Espíritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

18 Zeene blozh bin zho grë mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë menzit zrieelo gbig zho lo Dios, gdeed me ti guielmban ndzon ne gdziind dze lozh lo zho.

Bliladz zha Antioquí Xtiidz Dios

19 Zeene sca pquianał zho grë zha ne rililadz Jesús len dze ne beet zho Xteb ga, nēzrii nēzrec bliaał zho. No zho bdziñ haxta Fenicia, no zho bdziñ Chipr, nogaa zho bdziñ nēz Antioquí. Zaatne bdziinta zho bnee zho cho nac Jesús, per loxaque lo grë menladz zho bnee zhow.

20 Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús.

21 Ni ne nacie Dios zho, ndal grë miech co bzëëb xnëz Jesús.

22 Grë zha ne no Jerusalén, zeene gocnan zhow pxeelaque zho Bernabé güey Antioquí.

23 Zeene bdziñ Bernabé Antioquí, rley me gon me scataa quiayunlay Dios grë miech co; dzigo pso me diidz lo zho ib csaand zho zhiwseed Jesús.

24 Ti men dib zdoo rililadz Dios nac Bernabé, nacie Espíritu Sant me, ti miech wen nac me; gane

zeene laa me bdziṅ ga nzianraa zha ne bliladz Jesús.

²⁵ Goc palal dzew, dzigo güey Bernabé guiedz Tars güeyxi me Saul, bdziṅnie me Saul Antioquí.

²⁶ Dipse ti leṅ iz blöz zho ga grop zho, blozh pseed zho grë zha ne bliladz Jesús. Ga glopaa psilo ne laa grë zha ne rliladz Jesús brieelë CRISTIAN.

²⁷ Leṅ iz co blalaa zha ne noteed xtiidz Dios no Jerusalën. Dzigo brieë zho ga güey zho Antioquí.

²⁸ Lad co no tib meṅ lë Agab, psiaab Espíritu Sant guic me bnee me laa ti gbin dox gaṅ miech nöz Israel. (Ni nligaa scase goca, lëë gbin co biaad leṅ iz ne zobnabey meṅ ne lë Claud.)

²⁹ Grë zha ne rliladz Jesús Antioquí, zeene bin zho sca rëb Agab, nacne bnediidz zho grë zho, tel palaltaa ncuaane rgaa lo zho tib tib zho gdeed zhow gaclo ti gon cxeel zho lo zha Judé.

³⁰ Dzigo ptop zho gon co, zeene laaw goclo, pxeel zho Bernabé grop Saul güeyšana lo grë zha rnabey ne zo lo zha ne rliladz Jesús nöz Judé.

12

Bio Pedr ladzguiib

¹ Leṅ dze co psilo rey Herod notsidil me grë zha ne rliladz Jesús.

² Bnabey me bgaa Jacob bets Juan, beet zho Jacob lo spad.

³ Zeene gon Herod rley grë zha ne rnabey lo menquiedz Israel raṅ zho zha rsacsi me grë zha ne no xnöz Jesús ga, dzigo bnabeyaque me bgaa Pedr bio Pedr ladzguiib; lëëtaque leṅ dze co noyac lni Pascw.

⁴ Laa Pedr no ladzguiib, bnabey me bzo xon nēz menguiib quianap Pedr. Quiambēz me tedse lni co, laa me cuee Pedr gan grē menguiiedz zha csacsi me Pedr.

⁵ Grē zha ne rliladz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaque quianab zho lo Dios gacnien me Pedr.

⁶ Nacle diidz pa dze cuee Herod Pedr. Wdze ne guini liu co, laa Pedr nixguesse len ladzguiib; tib ga caden zob ti nia me, tibga menguiib tib nēz cue me, ni zhaaque zo zla zha ne quianap ro ladzguiib.

⁷ Tibaque zeene biab ti biinidoo len ladzguiib, laa ti xanjl Dios bdzin ga. Bdzin me, pcaannia me cue Pedr, pcuaan me Pedr, rēb me:

—iNa zeenguche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr;

⁸ dzigo rēbchaa anjl co lo Pedr:

—iPxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rēbchaa anjl co:

—iWbix xab luu na, zeendēnal zhits naa!

⁹ Nalse Pedr zhits anjl co laa Pedr briee ga. Riend Pedr ne nli nosilaa anjl co Pedr, masaque rzac me nonixquieel mew.

¹⁰ Bded zho chop len yu zaatne ndxie menguiib ne quianap, laa zho bdzin zaatne quia puert guiib ne rriee ro nēz. Zigne bdzin zho, zhal puert co bzhiala; laa zho briee. Bzēnie anjl co Pedr spalal, zeene gol zho zaatne rdedlsa nēz co, dzigo laa anjl co psang Pedr ga.

¹¹ Dzigoraa bien Pedr led nonixquiee_ld Pedr, nli Dios pxeel xanj_l me güey_silaa Pedr ladznia Herod, zeena gleyd zha Israel nian zho grë guie_lnë ne nded Pedr.

¹² Dzigo laa Pedr zie nëz lidz Marí, xniaa Juan Marcw; lëetaque hor co nzian zho ndxie ga quianab zho lo Dios.

¹³ Zeene bdzi_n Pedr pcaannia Pedr ro yu. Brie ti ndzoo_p ne quia dziin ga lë Rode, zieso ndzoo_p die_n chow.

¹⁴ Zeene beenbey ndzoo_p co tsi Pedr, rley ndzoo_p. Lo guie_lbley co niicle pxaldaqe ndzoo_p ro yu, rias ndzoo_p zienie ndzoo_p diidz lo grë zha ne ndxie ga; rëb ndzoo_p laa Pedr bdzi_n ro yu ga.

¹⁵ Per biladzd zhow.

—¡Dieen pe rool_l luu! —rëb zho—. ¡Ncuane gliladzd ne rnee luu!

—¡Coo, nli lëe mew! —rnee ndzoo_p—, laa me zo ga.

—¡Led meda, —rnee zho—, bod anj_l ne quianap mew!

¹⁶ Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho go_n zho nli Pedra, laa Pedr zo ga.

¹⁷ Dzigo blunia Pedr lo zho gnee nguiedzd zho; laa zho bzëebnie Pedr len_n yu. Ga psilo Pedr bzodidz Pedr lo zho zha güeybee xanj_l Dios Pedr len_n ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brie ga.

¹⁸ Zeene biini liu, grë menguiib ne pquianap Pedr len_n ladzguiib ga, rdzieldraa zho zha gu_n zho; sac ib biend zho die_n yo Pedr.

19 Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacne bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieë Judé zey me Cesarea.

Dow mziog Herod

20 Len dze co, pcaalsa menüedz Tir ni menüedz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tñniedraa me zho, niicle zhagaaw laa zho gbig lo me; sac grëse ncuaane rquiin zho, grë guiedz ne rnabey me ga rrieew.

21 Dzigo bzo Herod ti dze ne tsie zho tsiezodidznie zho me. Zeene gol dze co, got me lar niazh ne racw rey; bdziñ me bzob me lo zhixcan me, psilo me bnee me lo grë miech co.

22 Goc palo quianee me, psilo zho rleynie zho me, ngüedz roptsie zho rnee zho:

—¡Led miechdraa i gon! ¡Ti diosle i nac men qui quianee lo ne!

23 Laa me bii quianeeque, zeene biet tib xanj Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey.

24 Laa Xtiidz Dios, zigse zie dze laaw quia-gaazraa lo miech; ndal zha cub ne nozëëb xnëz me.

25 Jerusalén ga no Bernabé grop Saul len dze co; zeene bialse xtisiñ zho, laa zho brieëque ga laa zho zie nëz Antioquí zienie zho Juan Marcw.

13

¹ Lo grë zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad grë zha co no Bernabé, no ti mguí lë Simón ne rnee zho “Men Yaas”, no ti men Ciren lë Lus, gaque no Saul, ni ti men lë Manaén, bets pchoob Herod.

² Laa ti dze lëëtaque ndxie zho noyoolnie zho Dios ni nocuan zho, zeene laa Espíritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa gun zho.

³ Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnaab zho lo Dios gacnieu me zho; bnee zho lo zho, laa zho zie.

Güey Saul Chipr grop me Bernabé

⁴ Ga briece Bernabé grop Saul zienie Espíritu Sant zho bdziin zho guiedz Seleucia, Seleucia bzëëb zho barcw laa zho zie nëz Chipr (ti guidzliu win ne no lo nisdoo).

⁵ Ye Juan Marcw zienie zho gun xyudar zho.

Bdziin zho ro guidzliu win co zaatne ndxie guiedz Salamin, biet zho barcw güey zho grë len xyadoo men Israel ne no ga, güeyseed zho miech Xtiidz Dios.

⁶ Ga briece zho güeyted zho dipse lo guidzliu co bdziin zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

⁷ Guiedz co ga no ti meṇ lē Sergio Paul, meṇ co zob rnabey guidzliu co; dzigo lo meṇ co ga no Barjesús. Ti meṇ nixbiini nac meṇ ne lē Sergio ga, no me liaadz gacnaṇ me zha nac Xtiidz Dios; dzigo bnabey me gocredz Bernabé grop Saul.

⁸ Zeene bdziṇ zho psilo Barjesús quiaguib me dieṇ pe yquiaaqui yquiaadiagd meṇ rnabey co Xtiidz Dios.

⁹ Dzigo buitipaque Pabl lo Barjesús (Pabl nac sti lē Saul), ni ne nacie Espíritu Sant Pabl

¹⁰ rēb Pabl lo me:

—¡Biche nu zhin meṇdox! Zhin meṇdox goṇ nac luu, squitaa noquidiee luu miech, notsidil luu diidzli. ¿Zha rna dze ne csaan luu miṇe nac luu i, squi notsidil luu Xtiidz Dios?

¹¹ Goṇ ganle, ¡laa Dios csiaabzi luu, niinagazh laa lo luu ycow, ni spalal xbiini ngbidz gaṇdraa luu!

Zigne sca rēb Pabl laa lo meṇ co pcow, nēzrii nēzrec zie me racladz me dieṇ cho gnaaz nia me.

¹² Zeene goṇ meṇ rnabey co sca pcow lo Barjesús, hor co bliladz me Xtiidz Dios, bzee zdoo me goṇ me scataa poder ne ziaadnie zhiwseed Dios.

Bdziṇ zho guiedz Antioquí

¹³ Bded ga, laa Pabl gza Bernabé ni Juan bzēeb barcw stib, laa zho zie nēz xtan zha Panfil. Bdziṇ zho guiedz Perg laa zho briele leṇ barcw, ga ptso Juan lo zho, laa Juan zey nēz Jerusalén;

¹⁴ laa zho bio nēz zie zho nēz xtan zha Pisid, bdziṇ zho sti guiedz lē Antioquí.

Zeene goṇ dze ne rdziiladz miech lo dziin, güey zho xyadoo zha Israel.

¹⁵ Blozhse bded zha ne blab lo guits ne pquiaa Moisés, ni blab zho miṇe pquiaa grēraa zha ne

biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

¹⁶ Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

¹⁷ 'Dios ne rliladz no nac no men Israel, ib me bzooblo grë pxozgol no laa zho bgab lo me. Me gocniën zho zeene bio zho ladz men Egipt, ni me güeysilaa zho ga, blu me ganle ne nli men nroob nac me.

¹⁸ Dipse len choo iz ne bio zho grë dan bidz ne bded zho ga, pxecw me grëtaa xquieIntseeb zho.

¹⁹ Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho.

²⁰ Ni dipse len tap gayoo grol iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel.

²¹ Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtii pxozgol no Benjamín.

²² Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zun David mine gnabey naa.”

23 Ni lo xtií David co nagon brieequia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmenḡol no padzeela.

24 'Len dze ne merle xoobnen cho nac Jesús, len dze co bnee Juan Bautist lo grē men Israel: csaan zho xquieḡntseeb zho gnab zho perdon lo Dios, zeena chobnis zho.

25 Laa zeene zhile gdziḡ dze ne gut zho Juan, dzigo bnee me lo miech rēb me: "Golḡacnaḡ ganle, led naad nac men ne quiambēz to ga cxeel Dios. Merle gunbey to me, ti men non nac me, per ni par gac naa ti ngunḡdziin win ne glit lab me ni me raguaḡd naa."

26 'Golḡacnaḡ sca ganle bets: zigtaa tow ne ziaad to lo xtií Abraham, zigtagaa tow ne nac to miech stib guiedz zha ne rliladzle Dios, ib laa Dios pxeel Jesús csilaa me ne lo xtol ne grēse ne.

27 Grē zha Jerusalén ni grē zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grē guits ne pquiaa zha ne biadteed xtiidz Dios padzeela; haxta bnab zho gut me zigne bneese grē zha co.

28 Niicle ne goḡ zho peet xtold me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

29 'Blozhse psacsi zho me, pteed zho me grēse zigne bzeetle grē zha ne biadteed xtiidz Dios ga, dzigo güey zha ne blit me lo cruz, güeyqueets zho me.

30 Per bleeban Dios me.

31 Grē zha ne güeynaḡ zhits me zeene brieē me Galilé bdziḡ me Jerusalén, nzian zho goḡ me; ni

niina grēse zho laa zho quianee lo miech ganle cho nac me.

³² 'Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela.

³³ Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu."

³⁴ Ni bzeetle Dios ne laa me cueeban Jesús, bzeetle Dios xiñd xcuerp me len baa; min co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa."

³⁵ Laa stib lo Salm ne pquiaa David rnee: "Gdeete luu diidz xiñ xcuerp naa len baa."

³⁶ Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqeets zho me, ga bnitlo xcuerp me.

³⁷ Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

³⁸⁻³⁹ 'iGrēse to bets, golgacnan sca ganle! ¡Jesús nac men ne rsilaa miech lo dol! Zha ne gliladztaa me dib zdoo zho, tel pe nactaa grē xtol zho, sanmbe me zho. Mine wlalaa brieelod ngaa to, niicle ne ziana to xley Moisés; sac niicle gun tow grēse zigne naca, csanmbeda to lo dol.

⁴⁰ 'iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

⁴¹ Grēse to ne rzhidznie to mine nac diidzli, bii zan to ganle laa naa gun ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

⁴² Blozh bnee Pabl; laa zeene laa Pabl griee ga grop Pabl Bernabé bñab grë miech co lo zho, siguiel zho quiet sti zhmal co biire tsie zho tsieseed zho zho.

⁴³ Zeene brieë zho len yadoo co, nzian grë zha Israel, nzian grë zha stib guiedz zha ne rliladzle Dios zienal zhits zho. Néz no zho bnee zho lo grë miech co tiblique tso guic zho tsienal zho zhiwseed Dios, guien zho ganle pa lotaa noxco me zho.

⁴⁴ Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios.

⁴⁵ Zha ne rnabey lo grë zha Israel ne no ga, zeene gon zho scataa ndal miech ne goclo ga, blëë zho lo Pabl, ndox zho lo me, rëb zho led diidzlid nac mine rseed me.

⁴⁶ Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo riegual yquiaadiag Xtiidz Dios ne nac to zha Israel. Per ne squi run to guielntseeb nëde to ycaania tow par ygaa to guielmban ndzon ne rneedz Dios; na laa no guioseed grë zhazit.

⁴⁷ Ni scalegaa rnabey Dios gaca, sac znu rnee me:

Laa naa bzole luu tsieneë luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu;

zeena guien zho zha laa zho lo dol.

⁴⁸ Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios

scataa ndzon nac Xtiidz me. Grëse zha ne nole yгаа guielmban ndzon ne gdeed Dios ga, grëse zho dze cogazh laa zho bliladz Jesús.

⁴⁹ Dipse dan co, gocnañ miech Xtiidz Dios.

⁵⁰ Grë zha Israel ne rlëe lo Pabl ga, psilo zho pquuil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeeña ctsidil zho Pabl grop Bernabé, guncxoon zho zho dan co.

⁵¹ Zeene bin Pabla grop Bernabé, par glu ne nonguield sca been zha co zho, beenmbe zho grë yudie co ni zho laa zho brieeg ga, laa zho zie nëz Icon.

⁵² Grë zha ne bliladz Jesús ga, nguieel rac zho, rdeed Espiritu Sant guielbiini lo zho.

14

Bdziñ Pabl Icon grop me Bernabé

¹ Zeene bdziñ Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza.

² Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé.

³ Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

⁴ Dzigo grë miech ne no lad guiedz co goc zho chop dii, grol zho racnie grë zha Israel ne rlëë ga, zgroł zho racnie grop zha poxtl co.

⁵ Zha ne rlëë ga, zigtaa zha Israela zigtagaa zha guiedz cow, bnediidz zho grë zho wxtis laa zho tsie tsiedeedquie zho Pabl grop Bernabé.

⁶⁻⁷ Zeene bin Pabla grop Bernabé, mazd laa zho brieë ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

⁸ Guiedz Listr ga goṅ zho ti mgui në ni, waltaa lo xquiełmban me ib gard së me; sac scale në ni me zeene gol me.

⁹ Zeene goṅ Pabl dze zob me rquiaadiag me miṅe nonee Pabl lo grë miech co, dzigo dzeque bui Pabl lo me, goṅ Pabl dib zdo me rliladz me nli zrieelo guṅguiac Dios me;

¹⁰ dzigo nguiedz bnee Pabl lo me, rëb Pabl:

—¡Beenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë.

¹¹ Zeene goṅ grë miech co sca biac me, psilo zho con xtiidz zho nguiedz rnee zho:

—¡Diosle i goṅ, nasi zig rlu miech rlu me laa me biet gbaa ziaadgaṅ me ne!

¹² ¡Masaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee.

¹³ Ro guiedz co ga zob xyadoo zhimdio zho Júpiter, dzigo brieë pxoz ne no yadoo co grë me miech lad guiedz, zienie zho ngon, zienie zho

guiee, nan zho gut zho ngon co cogon zho ma lo Pabl grop Bernabé.

14 Zeene bien Pabla grop Bernabé wbinladz guic zho. Ptsiez zho xab zho, bzëeb zho lad grë miech co, nguiedz rnee zho lo zho:

15 —iNdzinli golgac! ¿Pe nacne squi rac to? iGolgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grëse ncuaane no gbaaw, ncuaane no lo guidzliuw, ncuaane no lo nisdoo, me bzaaw grësew.

16 Niicle ne glo bdeed me diidz been miech grë ncuaane gocladztaa zho,

17 per psaanladz me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaane rdioow ne gzataa dze, rneedz me guiebley lo ne.

18 Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

19 Len dze co, blalaa zha Israel ne ziaad nëz Antioquí ni nëz Icon bdiin Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tblad ro guiedz.

20 Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me

laa zho zeynie me nēz leŋ guiedz. Biini liu, pcaa me nēz grop me Bernabé laa zho zie nēz Derb.

²¹ Bdziŋ zho Derb, psilo zho bnee zho Xtiidz Dios lo grē miech co; ndal grē zha ne bliladza. Blozh ga, laa zho wbi ga biire güeyted zho nēz Listr, güeyted zho Icon, ni güeyted zho Antioquí,

²² güeynee zho lo grē zha ne rliladz Jesús ga, pchoobladz zho zdoo zho, pso zho diidz lo zho, nice nroob guiełnē ne noded zho per none tibaque gac guic zho tsienal zho Xtiidz Dios; sac ible sca nzian ncuane ted zho laga gdziŋ dze ne gdziŋ zho zaatne rnabey Dios.

²³ Tib tib guiedz co, bzose zho grē zha ne so gnabey lo grē zha ne rliladz Jesús ga; rlozhse rcuan zho grē zho zho ni rzodiidznie zho Dios, dzigo laa zho rsaŋ zha co ladznia me yquianap me zho.

Bdziŋ Pabl grop Bernabé nēz Siria stib

²⁴ Nēz no Pabl grop Bernabé bded zho dib xtan zha Pisid, bzëeb zho xtan zha Panfil, bdziŋ zho guiedz Perg.

²⁵ Blozhse bnee zho Xtiidz Dios lo grē miech co, dzigo laa zho brieeg ga, bdziŋ zho guiedz Atalia.

²⁶ Atalia ga bzëeb zho barcw bdziŋ zho sti guiedz ne lē Antioquí, gataa laa zho psiaal viaj co. Guiedz coque ga brieeg zho grop zho güey zho grē guiedz co güeynee zho Xtiidz Dios lo miech; zeene sca bnab grē zha ne rliladzle Jesús ga lo Dios gacniē me zho tsiegun zho xtsiŋ me.

²⁷ Zigne bdziŋ zho Antioquí ga, bnabey zho pcaalsa grēse zha ne rliladz Jesús, bzodiidz zho lo grē miech co grēse zha gocniē Dios zho güeygun

zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

²⁸ Xtselaa bio Pabl ga grop me Bernabé, blëz zho lo grë zha ne rliladz Jesús ga.

15

Pcaalsa zho Jerusalén

¹ Ga no Pabl grop Bernabé zeene bdziñ bla zha ne ziaad nëz Judé, psilo zho noseed zho grë zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

² Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bnediudz grë zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiudz zho lo zha poxtl ni lo grë zha ne rnabey lo zha ne no ga, dieñ pe guiab zho.

³ Nacne brie zho zie zho. Nëz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiudz zho lo zho grëse zha nobedz Dios grë zha ne nacdreaa zha Israel, rsaan zho grë zhiwseed xmengol zho laa zho rliladz Jesús. Rley grë miech co ron zhow. Sca bio zho nëz, laa zho bdziñ Jerusalén.

⁴ Zeene bdziñ zho Jerusalén, pcaalsa grë zha poxtl, grë zha ne rliladz Jesús ga, ni grë zha ne rnabey lo zho. Dzigo ga bzodiudz Pabl grop Bernabé grëse zha gocnie Dios zho, zeene güeyted zho grë dan co güeynee zho Xtiudz me lo miech.

⁵ Min co quianee zho zeene guso bla zha ne glo goc farisé rëb zho, grë zha ne nacd zha Israel zeene

laa zho rliadz Jesús ib none tso zho bey, ni none gun zho grëse mine rnabey Xley Moisés.

⁶ Dzigo nacne bnabey grë zha poxtl co ni grë zha rnabey co, ycaalsa zho stib dien zhapaa gaca, pe nonguiela tso grë zha zit bey co.

⁷ Zeene pcaalsa zho, goc pa lo quianee zho zeene guso Pedr rëb Pedr lo zho:

—Grëse to bets, golquiaadiag mine gne naa lo to nu ganle. Led rsoladz to, zeene griinpaa psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel gliladz zho me.

⁸ Ni megaa ne runbey me zdoos tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacie zho, zigne pxeelaque Espiritu Sant nacie ne.

⁹ Gotsaa gwi ne ganle, led yed Dios rbe dien cho nac zha Israel cho nacgaa zha zit; zigtaa zhaw, zigtagaa new, laa me pcaania ne porne dib zdoos ne bliladz ne me.

¹⁰ ¿Zha nac dzigo ne racladz to gnabey to grë zha co gun zho grë mine nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmenjol ne brieelod niuna zigne naca!

¹¹ Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuaane rdziuun ne; sinque laa me csilaa ne porne nquialadz me ne.

¹² Zeene blozh sca bnee Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë menzit zaatne güeynee zho Xtiidz me lo grë miech co.

13 Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to.

14 Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëëb xnëz me.

15 Ga nagon goca zigne zhobneese lo Xtiidz me, minë pquiaa grë zha ne pxeel me padzeela, rneew:

16 Tedse nu ganle,

laa naa cuedz grëse miech ne ygab lo naa;

grë zha xtii David zha ne bzozit, laa zho gbig stib.

17 Horco grëse zha zit, laa zho gon ganle cho nac naa,

zeena grieelo sëëb zho xnëz naa.

18 Znu nac xtiidz Dios, ni padzeelale bzeet me ne laa me gun min co.

19 'Min co nagon grë zha zit ne rliladzle Jesús, ib nonguielda ga gnabey ne zho gun zho minë nac xley ne.

20 Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhindio zho, ib gowd zho bëël co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

21 Niicle mazd padzeelaw, tibaque quiayon miech gund zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

²² Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rililadz Jesús ga.

²³ Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rililadz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

²⁴ Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no gun to. Gacnan to ganle led nod pxeel zho,

²⁵⁻²⁷ gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiaayun zho xtsiin Jesús.

²⁸ 'Lo godiidz ne bdziuun no, laa no bdzianle nonguiēda ne dien peraa gnabey no to gun to, ni niiclegaa Espíritu Sant scaque rnee me. Rquiind ne peraa gun to, lëēlew ga totsaque tsoxco to

²⁹ gowde to xpëel grë ma ne rgogon miech lo grë zhindio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tsieel zho; niiclegaa wnaaw, nodne tsonie zho mgui ne nacd tsieel zho. Min rii nagon nac mine no tsoxco to.

'Guiaañnie Dios to sca.”

³⁰ Gza tap zha co laa zho brie Jerusalén, laa zho zie nëz Antioquí. Zeene bdziñ zho ga, bnabey zho pcaalsa grëse zha ne riladz Jesús, dzigo bdeed zho guits co lo zho.

³¹ Zeene gocnan grë zha co zha rnee low, rley zho sacne pchooblada zdoo zho.

³² Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guiełbiini lo Judas grop Silas rteed zho xtiidz me lo miech.

³³ Xtselaa blëz Silas ga grop Judas, laa zeene gol dze ne laa zho griee gbiire zho nëz Jerusalén stib, ine güeyzonëz grë zha co zho, rdeed zho xquizh lo zho.

³⁴ [Laa zho nole nëz, tibaque zeene rëb Silas laa Silas guiaanaque ga spalal dze.]

³⁵ Laa Pabl grop Bernabé ible laa zho biaan ga been zho xyudar grë zha ne noseedle miech ga.

Ptso Pabl grop Bernabé

³⁶ Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnañ zho dieñ yo grë zha co.

³⁷ Dzigo gocladz Bernabé ye Juan Marcw nienie zho;

³⁸ per bzhiguiel Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynałd Juan nlozh nsiaal zho lo dziin co.

³⁹ Miñ co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëeb

zho barcw zie zho nēz lo guidzliu win ne no lo nisdoo lē Chipr;

⁴⁰ laa Pabl goc grop Silas. Blozhse bnab grē zha co lo Dios gacniēn me Pabl grop Silas, laa zho brieega

⁴¹ güeyted zho grē guiedz ne ndxie nēz xtan zha Siria, grē guiedz ne ndxie nēz Cilis, güeynee zho lo grē miech ne rliladz Jesús nēz co, güeychoobladz zho zdoo zho.

16

Beenbey Pabl Timoté

¹ Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lē Timoté, ti men Israel ne rliladzle Jesús nac xniala me, laa pxoz me nac men Gres.

² Grēse zha Listr, zha Icon, zha ne rliladz Jesús tibaque rzeet zho Timoté rnee zho ti miech ndzinli nac me, nacte bnee Pabl lo me tsienal me zhits Pabl.

³ Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeeṇa tsod pe glisqui grē zha Israel ne no nēz co.

⁴ Laa me zienal zhits Pabl. Guiedz ne rdedtaa zho rnee zho lo grē zha ne rliladz Jesús ga, tsoxco zho gun zho grē mine pso zha poxtl ga diidz, grē zho zha rnabey ne no Jerusalén.

⁵ Zeene ron grē zha cow, dib zdooraa zho rnalo zho Dios, zigse zie dze racnzianraa zha ne rliladz Jesús.

⁶ Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho

Xtiidz Dios lo miech grë guiedz ne ndxie nëz Asia ga.

⁷ Zeene bdziñ zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espíritu Sant diidz nie zho nëz co.

⁸ Dzigo tibbdeed zho dib xtan Misia bdziñ zho ti guiedz ne ndxie ro nisdoo lë Troas.

⁹ Guieel co blulo ti mgui Macedon lo Pabl, rnab me gun Pabl guieñzaac tsie Pabl nëz co, tsiegun Pabl xyudar grë miech co.

¹⁰ Nacne hor cogazh bzhixcuaa no, sac bieñ no ible Dios racladz guio no nëz co guionee no Xtiidz me lo miech.

¹¹ Dzigo brieë no ga bziaab no ti len barcw bdziñ no ti lo guidzliu win ne no lo nisdoo lë Samotras. Biini liu brieë no ga bdziñ no Neápolis, ga bliaaz no wdze co.

¹² Biini sti liu co brieë no Neápolis bziani no bdziñ no Filip. Lëë guiedz co riaan zaatne rsilo xtan zha Macedon, niapse meñ Roma no ga; nzianlaa ngbidz bliaaz no ga.

¹³ Laa tib dze ne rdziiladz miech lo dziin, brieë no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa meñ wnaa ndxie ga, dzigo psilo no bnee no lo zho cho nac Jesús.

¹⁴ Lad co no ti wnaa Tiatir lë Lidia, rto me grë lar nizhnie nlaan miñe nac lar niazh; ye me dib zdo me riladz me Dios. Laa me noquiaadiag miñe nonee Pabl ga, zeene psiaab Dios guic me bliladz mew.

¹⁵ Dzigo hor cogazh brobnis me grë meñlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacne biobiaaзаque no lidz me.

Bio Pabl ladzguiib grop Silas

¹⁶ Tib dze, lëëtaque zio no zaatne riozodiidznie no Dios, bdzieelo no ti ndzooп nguieg noguitnie mendox. Zëëb diidz grëse tel pe r nabdiidz miech lo ndzooп, rnee mendox cow; nroob dimi ne riab nia zha ne rnabey ndzooп.

¹⁷ Nał ndzooп zhits no, nguiedz roptsie ndzooп rnee ndzooп:

—¡Xtsiin Dios ndzon ne zob gbaa gon noyun gza mgui rii! ¡Laa zho ziadseed to zeena gacnan to zha csilaa Dios to lo xtol to!

¹⁸ Nzian dze zaatne rdzieeltaa no ndzooп tibaque sca rnee ndzooп. Zeene bieedtaa guic Pabl, biireque me bnee me lo mendox ne noguitnie ndzooп ga, rëb me:

—Jesús nacie naa, ni laa naa rnabey luu gon niinagazh psaan ndzooп qui.

Zigne sca rëb Pabl laa mendox co bzhoon.

¹⁹ Gza zha ne rnabey ndzooп ga, zeene gon zho rundraa ndzooп guiełnsin co gdziniaa ndzooп dimi, bnaaзаque zho Pabl grop Silas güeyzo zho zho lo wxtis, rëb zho:

²⁰⁻²¹ —¡Golwi ganle pe nac ncuaane noyun grop zha Israel rii lad guiedz nu! ¡Nogodil zho miech, laa zho quiaseed miech ncuaane nonguieldraa dziuun ne nac ne zha Roma!

²² Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brie

xab zho grop zho bdeed bar zho zho, nroob bdiñ zho zho.

²³ Blozhse bdiñ zho zho laa zho psëëb zho ladzguiib, bnabey zho meñ ne quianap ladzguiib ga tibaque yquianap me zho, sac tel̄ laa zho xoon me tsietizha.

²⁴ Zeene bin meñ co sca rëb zho, güeyaque me güeysëëb me zho stib leña miñe riaañ caañraa, ga psëëb me ni zho lad chop lë yag nroob.

²⁵ Wdze co, zig grol̄ guieela laa Pabl grop Silas bii noyoolnie Dios, ni rnab zho lo me gacnieñ me zho. Grëse zha ne no ladzguiib ga, ron zho sca no Pabl grop Silas.

²⁶ Tibaque zeene bni ti zhodox, psiniw dib nacse ladzguiib co, grëse ro ladzguiib co bzhial, guiib ne no nia grë zha ne no ga, wbīla.

²⁷ Lëëlëd brieë mcaallo meñ ne quianap ga, zeene gon̄ me grëse ro ladzguiib co zonial, masaque güeynie guic me bzhoonle grë zha ne no ga, bdobaque me spad ne ney me laa me zie gut me me.

²⁸ Horco broptsie Pabl lo me, rëb Pabl:

—¡Gute luu luu! ¡Grë no ndxie no, choot bzhioond!

²⁹ Lëëlëd bnab me biini, bzëëb nguzhoon me len ladzguiib, masaque rzhidz me dzeb pquiitsgzhib me lo Pabl grop Silas.

³⁰ Blee me zho ga, rëb me lo zho:

—Golnë lo naa, ¿pe nac miñe gun̄ naa zeena csilaa Dios naa lo grëtaa xtol̄ naa?

³¹ —Dib zdoo luu bliladz Jesús, meñ rnabey ne pxeel̄ Dios lo guidzliu —rëb zho—, dzigo silaa me luu lo dol̄, silaa me menlidz luu ne.

³² Dzigo güeynie me zho lidz me, bnee zho Xtiidz Dios lo me grë menlidz me.

³³ Guieel co no me bdiib me zhits zho, zaatne brëe bar ne bloobar zho zho; blozhse ga, laa me brobnis grë menlidz me.

³⁴ Bnabey me goclo ti guielwagw downie me zho, rley me, niicle grëgaa menlidz mew rley zho ne laa zho bliladz Jesús.

³⁵ Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas.

³⁶ Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca grieë to, peet tsieniedraa guic to.

³⁷ Dzigo rëbchaa Pabl lo zha ne bdziñnie diidz ga:

—jZha ndzielguictaa zhiwxtis to gon! Squi ndxie menquiedz bdiñ zho no, ni gardle gacnañ zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhliaanse grieë no. jLëda ga gon! jGoltsie golguiab lo zho, lëezhal zho guiaad guiadbee zho no nu!

³⁸ Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho;

³⁹ lëëled güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

⁴⁰ Ga brieë zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne rililadz Jesús, pso zho diidz lo zho tiblifique gac zho tsienal zho xtiidz me. Blozhse ga, dzigo laa zho brieë guiedz co.

17

Güey Pabl Tesalónica grop me Silas

¹ Brieë Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bđziñ zho guiedz Tesalónica. Lad guiedz co zob ti xyadoo zha Israel,

² dzigo güey Pabl güeynee me Xtiidz Dios lo grë zha ne rcaalsa ga, zigne ruñaque me grëraa guiedz ne zieded me.

Blëz zho ga tson zhmal, gzobse dze ne rdziiladz miech lo dziin güey Pabl güeyzodiidznie Pabl grë zha co,

³ bzeet me lo zho grë zaatne raquiet grëtaa ncuaañe ted meñ ne cxeel Dios lo guidzliu ga, ni zha grieeban me; ni blu me lo zho gacnañ zho ganle lëe meñ co ga nac Jesús.

⁴⁻⁵ Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole miñe rnabey Dios, ye blalaa meñ wnaa ne nac meñ non lad guiedz co. Laa zha Israel ne rnabey yadoo co, zeene goñ zho scataa ndal zha ne bliladz Jesús, blëe zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëeb zho lidz Jasón nañ zho niebee zho Pabl ga grop Silas, ngo zho zho ladznia grë miech co.

⁶ Zeene goñ zho bgaad grop zha co lo zho, bnaaзақe zho Jasón ni zla zha ne rliladz Jesús, bđobniu zho zho bđziñnie zho zho lo wxtis, roptsie zho rnee zho:

—¡Golgañ ganle laa zha ne sca quianzë nocots guic grë miech, laa zho blansole nu!

⁷ Ni Jasónpaa rdeed zaatne rbëz zho. Racladz-draa zho guñ zho miñe rnabey rey César, sac rnee zho no sti zhirey zho lë Jesús.

⁸ Grë zha wxtis co ni grë menquiedz ne pcaalsa ga, zeene bin zho sca rnee grë zha co, riendraa zho zha guñ zho.

⁹ Miñe been zho beenquizh zho Jasón ti mult gza Jasón zla zha co, dzigo laa zho wbi ga.

¹⁰ Pcow liu co, wxiña laa grë zha ne rliladz Jesús ga bleese Pabl ga grop me Silas, pxeel zho zho nëz Beré. Zigne bdziñ zho Beré, gloque ti xyadoo zha Israel güey zho.

¹¹⁻¹² Grë zha Israel ne no Beré ga, rley zho rquiaadiag zho miñe rnee Pabl grop Silas, gjobse dze rlab zho lo Xtiidz Dios rwi zho dien pe nli miñe rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

¹³ Laa zeene gocnañ zha Israel ne no Tesalónica laa Pabl nolaque guiedz Beré, güeyaque zho güeyquuil zho grë miech co glëenie zho Pabl.

¹⁴⁻¹⁵ Dzigo lëelëd brieë bla zha ne rliladz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysañ zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

Leñ dze ne no Pabl Aten

¹⁶ Laga quiambëz Pabl gdziñ Silas grop Timoté güey me güeyted me lad guiedz co, wbiñladz guic me goñ me led zhid grë mdio ne rieganañ grë miech co.

17 Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodidznie me zho grë zho zha guiedz co zha ne rliladzle Dios. Gzobse dze rie me leñ guiedz rienee me lo grë miech ne rdziñ ga.

18 Tib dze bdzieelo me bla zha rac ne zienal zhiwseed ti meñ lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieeban Jesús. Zeene bin zho zha rnee me, no bla zho rzhidznie me, rnee zho:

—¡Dieeñ pe riab guic meñ qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl;

19 dzigo rëb zho lo Pabl:

—Bzhiguiel mazd, së luu guio ne lozh sodiidz luu lo no dieñ zha nac wseed ne ziaadnie luu,

20 sac wlaltaa gard dzion no grë ncuaañe rnee luu i.

21 No zho liaadz gacnañ zho pe rnee Pabl, sac sca nac grë zha Aten, niiclegaa grë zha ne quiadziñ ga, rdziladz zho rded-dze zho rzodiidz zho dieñ zha nac grë diidz cub ne griiñ ron zho.

22 Bdziñ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to meñ Aten, ran naa ne nligaa rioxco to rleynie to grë meñ ne rzac to nac Dios;

23 sac leñ dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnañ sca ganle, Dios

ne runbeyde to ga, runbey naa me ni lëë zhiwseed me none naa lo miech len dze rii.

24 'Dios co bzaa guidzliu, me bzaa grëtaa ncuaañe no lo guidzliu; gacd ne guiab miech zha gzaa ti zaatne cuëz me, sac men nroob men rnabey nac me, me rnabey gbaa, me rnabey guidzliu.

25 Niicle rquiindgaa me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuaañe rquiin ne.

26 Lo tib nëzaque miech ne bzaa me ga, bnabey me brieequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho.

27 Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne,

28 sac gon, niapse por xpoder me laa xcuerp ne niaa zigne naca, laa ne mban, laa ne rriel. Lëëw ga bnee bla menladz to, zha rac ne znu rëb: "Xtii Dios nac ne."

29 'Gase na ganle gotsaa gwi ne, conque xtii Dios name nac ne, pe nac dzigo gliladz ne lëë Dios ga nac grë cho mdio or, cho mdio plat, cho mdio quie ne riab guic miech rzaa zho;

30 ni ib sca rliladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuaañe bliladz zho ga gbig zho lo me, mese gleynie zho;

31 sac laa me bzole tib dze ne gacredz grëse miech lo me ygaa zho miñe tsieguial zho tib tib

zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

³² Zeene bin zho bzeet Pabl no ti men ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

³³ Gataa pcuëez zho lo xcodiidz Pabl, laa Pabl wbi lo zho ga.

³⁴ Brieequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

18

Güey Pabl guiedz Corint

¹ Brie Pabl Aten bdziñ me guiedz Corint.

² Ga beenbey me ti men Pont lë Aquil, ti zha xti zha Israel nac Aquil. Roma no me glo, wriiñ bdziñ me Corint ga grop tsiel me; sac bnabey rey Claud brie grëse zha Israel ne no Roma.

³ Dzigo güey Pabl blëz Pabl lo zho ga, sac ye zho rzhixcuua grë lar nroob ne rquia ncal, tipse pquia zho dziin ga gza zho.

⁴ Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús.

⁵ Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús.

⁶ Laa zeene gon_{ta} me rond zho diidz, le_l ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—jLaa naa bial_l bial_lne naa lo to per pquiaadiagde to mi_{ne} rne naa; xtolle to nasca tel_l laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

⁷ Dzigo laa Pabl psilo güey lidz ti men_{ne} ne no gaxaque zaatne zob yadoo co lë me Just, dib zdo me rliladz me Dios.

⁸ Len_{ne} dze co ndal zha Corint bliladz Jesús zeene bin zho mi_{ne} rnee Pabl, haxta ti men_{ne} ne rnabey xyadoo zha Israel lë Crisp, grë men_lidz me bliladz Jesús, dzigo grëse zho laa zho brobnis.

⁹ Ti wdze blulo Dios lo Pabl, rëb me lo Pabl:

—jGdziebd luu! jib ycuëezd luu lo dziin ne noyun luu i, bnee xtidz naa lo grë miech qui! Ndal grë miech rii no sëëb xnëz naa.

¹⁰ Peet tsienied guic luu, choot grieelod lega pe gu_n luu sac naa quianaap luu.

¹¹ Nacne blëz Pabl ga stib iz gro_l, pseed me grë miech co Xtiidz Dios.

¹² Laa zeene bzob men_{ne} ne lë Galión zobnabey me xtan Acay, grë zha Israel ne no Corint ga bnediidx zho grë zho bnaaz zho Pabl güeyzo zho me lo Galión

¹³ rëb zho:

—Laa no ziaadnie mgui rii lo luu, sac laa me quiaguüits xley no, quiago me guic miech tsiegan zho Dios sti mod mi_{ne} ni nacd_{ra} ley.

¹⁴ Laa Pabl zie gnee, zeene pquiab Galión rëb me lo grë zha co:

—Tel_{ne} niaca mi_{ne} no pe ti falt, pe ti guiel_{nt}seeb ne quiayun_{ne} me, dzigosi naa raguial_{gun} guiel_{wxt}is.

15 Per telne laa to ziaadnie me nu porne rdziladzde to mine quiaseed me miech, rdziladzde to tel cho rzeet me, sac led scad nac xley to, tsow golgañ dien pe gun to. Nodaque xtil to guic naa.

16 Bleega Galión zho nēz ley.

17 Dzigo bnaaz zha guiedz co ti men lē Sóstenes, men ne rnabey xyadoo zha Israel ga; gonlo Galión bdiñ zho me, per peet rēbd Galión.

Biire bdziñ Pabl guiedz Antioquí

18 Goc spalal dze no Pabl Corint ga, dzigo bnee me lo grē zha ne rliladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieē, ye zho bzēēbgza me barcw, laa zho zie nēz Cencre. Lēētaaque len dze co noxco Pabl gun me tel pe nac ncuaane rēb me lo Dios gun me, dzigo zeene bdziñ zho Cencre bnabey me liu liu ptsiib guic me.

19 Cencre bzēēb zho barcw stib, zie zho nēz Efés. Bdziñ zho Efés, güey Pabl xyadoo grē zha Israel ne no ga güeynee me Xtiidz Dios lo zho.

20 Dzigo bnaab zho mbēz me lo zho ga ti blalaa dze, per brieelod mbēz me

21 sac laa guic me no gdziñniob me Jerusalén ygaa me lni ne ziaadyob len dze co, rēb me:

—Na telne zneedz Dios diidz, bii zialteedaque naa dien yo to.

Gataa biaan Aquil grop Priscil, laa me bzēēb barcw stib zie me nēz Cesarea.

22 Cesarea brieē me barcw, laa me zie nēz Jerusalén. Bdziñ me güeyquiaabdiuzh me grē zha ne rliladz Jesús ga; biireraa me ga bdziñ me Antioquí.

²³ Goc palal dze no me Antioquí, laa me brieaque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne riladz Jesús ga dib zdoo zho gleynie zho Dios.

²⁴ Leñ dze co bdziñ ti men xtií zha Israel guiedz Efés, ti men Alejandríw lë me Apol. Ti zha rac nac me, rien me zha gnee me Xtiidz Dios lo miech.

²⁵⁻²⁶ Güey me xyadoo zha Israel ne no ga, nguieel rac me, peet dzeb guiend lo me psilo me nonee me lo zho grëse mine bnee Juan Bautist zeene bzeet Juan Jesús; sac loxaque min co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

²⁷ Grë zha ne riladz Jesús ga, zeene gocnan zho laa guic me no tsie me nëz Gres, dzigo ye zho rëb wen tsie me, pquiaa zho ti cart pxeel zho lo zha ne no nëz co zaacse ycaania zho me. Zeene bdziñ me nëz co, pseed me grë zha co. Rley zho blozh gocnan zho cho nac Jesús;

²⁸ sac squi ndxie miech rsioog me ro grë zha Israel, rnee me lo zho lëële men ne quiambëz zho cxeel Dios ga nac Jesús, ni rlu me lo zho pa lo zhobneew lo Xtiidz Dios.

19

Biire güey Pabl Efés

¹ Leñ dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nëz xtan zha Galás, laa me bdziñ ga. Ga bdzieel me blalaa zha ne riladz Jesús,

² dzigo bnabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene bliladz to Jesús?

Pquiab zho rëb zho:

—¿Guiełbiini ye? Gard gon dzion no rdeed Espíritu Sant guiełbiini.

Dzigo rëbchaa Pabl:

³—¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

⁴ Dzigo bnee Pabl lo zho zha nac wrobnis ne biaadnie Juan. Rëb me lo zho nacse wrobnis co par glu miech ne laa zho csaan guiełntseeb, laa zho sëeb xnëz Dios; per grëse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

⁵ Miñ co bin zho nacre brobnis zho stib zigne psan Jesús diidz.

⁶ Zeene laa Pabl pxobnia guic zho bnab me gdeed Espíritu Sant guiełbiini lo zho, hor co psilo zho nzian lo diidz ne rnee zho; ni bnee zho tel pe nac miñe racladz Dios gacnañ miech.

⁷ Lo gza zho rgaa zho tsiipchop, niapse zha bguiw.

⁸ Tson mëë blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús.

⁹ Per zeene gon me no palal zho ib rond diidz, lel psilo zho squi ndxie miech rneenë zho Jesús, nacre bleextsoque me grë zha ne rliladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

¹⁰ Dipse len chop iz blöz me ga pseed me grë zha co; nacne grëse miech ne no dib nöz Asia ga, zigtaa zha Israela zigtagaa grëraa miech cow, bin zho zha nac Xtiidz Dios.

¹¹ Bdeed Dios diidz been me grë milagr nroob ne rzee zdoo miech;

¹² sac haxta lar ne rzëse nia me, lar ne rbixse me rzhooob lad men ne rzacne laa zho riac, niicle grëgaa mendox ne noguitnie miecha, rzhooon ma.

¹³⁻¹⁴ Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho mendox ne noguitnie miech. Ti vuelt, nan zho na ye zho cuedz lë Jesús gacniën me zho guncxoon zho mendox; bdzin zho zaatne guncxoon zho ma, rëb zho:

—jZig zobwi Jesús ne rzeet Pabl, laa no rnabey to golrieegazh i niina!

¹⁵ Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

¹⁶ Znuse bias men ne noguitnie mendox co, bnaaz me gza zha co bdiën me zho. Ib blëbd zho lo me, masaque dib brëë rna zho, ni xab zho nacwdraa, laa zho bzhoon.

¹⁷ Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli men non, men rnabey nac Jesús.

¹⁸ Haxta ye grë zha ne riladzle Jesús, hor co laa zho bleero pe nac grë ncuane ndzinlid ne bliladz zho glo.

¹⁹ Nzian zha ne biil diidz dox güeyxi zho grë xquits zho, squi ndxie miech laa zho bzëëga

grësew. Zeene biobey palal gocnon grëtaa guits co, biirew zig chooptsii mil pes plat.

²⁰ Ga blu poder ne nacnie Xtiidz Dios, sac grë zha ne bina bdzëë lo xquielmban zho.

²¹ Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me tsie Jerusalén stib; haxta rnee me Jerusalén grieve me tsie me Roma.

²² Nacne ptedner me Timoté grop Rast (zha ne noyuj xyudar me len dze co) zie zho nëz Macedon, laa me bii biaan nëz Asia ga.

Gocntseeb zha Efés

²³ Len dze co brieequia palal zha Efés ptsidil zho zha ne rliladz Xtiidz Dios.

²⁴ Guiedz co no ti men ne rundziin guiib plat lë Demetr, rzaa me grë yadoo yeen zig niaada xyadoo xnaxnazh zho Dian; nroob dimi ne rial me grë me zha ne runnie me dziin co;

²⁵ bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

²⁶ —Rien naa ziyonle to, ziyangaa to ganle laa mgui ne rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun ne?

²⁷ Golguien ganle noxtseeb guiabdraa xtsiin ne, ni nanwen to ganle lëë xtimi ne nu. Ni tebaa mincosegaaw, mine mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibgaa lo guidzliuw con guiaanladz zho me.

28 Zeene gon gre zha co sca rëb Demetr, rlëe zho, roptsie zho rgo zho xviv Dian.

29 Wdzeepaaw grese menquiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoobniu zho zho bdziñnie zho zho ro yulow.

30 Nacne gocladz Pabl nie me nienee me lo gre miech co, per psaand gre zha ne rliladz Jesús ga.

31 Haxta bla zha wxtis ne ndzieeldiidz Pabl, pxeel zho diidz lo me tsied me.

32 Zhaase zhaase rnee gre miech co ndxie zho ro yulow ga, no zho haxta ni rienð pe nacne zie zho ga.

33 Blalaa zha Israel, zeene gon zho scataa rac gre miech co, bdoob zho zhicw ti men læ Lejandr gocladz zho nee me chop lan xtiidz zho. Laa men co blis nia me parne cuedze zho gnee me;

34 zeene gon zho zha Israel nac me, psilo zho stib grese zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnazh ne!

Zig chop hor bre zho ga sca roptsie zho.

35 Dzigo brieen men ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Golgona ganle, grese miech lo guidzliu nan zho guiedz rii zob nazhnazh Dian, nan wen zho gbaa biet me zob me nu;

36 tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi læëled dieen pe rzhixcuaa to.

³⁷ Go_lwi gan_le, laa to ziaad-zo grop zha rii nu, ¿pe nadien_n been_n zho? Nacd zho cho zha ne quiagui-tnie yadoo, cho zha ne nozhidzniegaa xnaxnazh ne.

³⁸ Nana, tel_ne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guiel_wxtis, ni zogaa zha ne yquiaadiaga. ¡Ga glisqui zho pe run_n tib, pe run_ngaa stib!

³⁹ Laa tel_ne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien_n zha niaca.

⁴⁰ Sac gon_n ne squi been_n to nadze, noxtseeb glisqui zha Romaw lo ne; ni pe nadien_n dzieets ne tel_ne laa zho glisquiw.

⁴¹ Blozhse sca bnee me laa me wbi lo zho ga, niicle zhagaaw laa zho zey.

20

Güey Pabl nëz Macedon ni nëz Gres

¹ Zeene laa ruid co blëz, dzigo bredz Pabl grëse zha ne rliladz Jesús, bnee me lo zho zaacse gac zho. Blozhse bnee me lo zho, laa me brieë ga zie me nëz xtan zha Macedon;

² güeynee me lo grë zha ne rliladz Jesús nëz co, pso me diidz lo zho zaacse gac zho. Nëz co brieë me bdzi_n me nëz Gres. Ga blëz me tson_n mëë.

³ Laa zeene laa me gbi ga tsie me nëz Siria, laa me ziele sëëb me barcw zeene gocna_n me laa zha Israel ne no ga bnediiz pa tsietin_n zho me, nacne güeydaque me barcw, mazd bio me nëz güeyted me nëz Macedon.

⁴ Blalaa zha ne bzënaḷ biogza no me, bzë ti men Beré lë Sópater xingan ti men lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nëz Asia, Tíquico ni Trófimo.

⁵ Goḷ no Filip laa zho bner, per biaanḷ no diidz Troas cuëz zho no;

⁶ laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieeg ga. Goc gaay ngbidz no no lo nis laa no bdziḷ lo zho Troas, dzigo bliaaz no Troas ga gadz ngbidz.

⁷ Zeene goḷ dze dmingw, bio no yu ne rcaalsa zha ne rliladz Jesús ga. Ti yu tsonḷ xcuaaw, laa no pcaalsa par dziuunḷ no xtsee ne psanḷ Jesús diidz ga gunḷ grë zha ne rliladz me. Laa no ndxie grë no, dzigo psilo Pabl pseed me no; nzian ncuaane nonee me lo zho sac guini liu co laa me greeg ga; goḷ groḷ guieela rsiaaldaque me.

⁸⁻⁹ Nzian nac biini ne noquia lenḷ yu co; zaatne nac ro ventan ga zob ti niib lë Tic. Wdzeelaaw rsiaaldaque Pabl, tibaque bzhenḷ mcaalḷ niib co, wbix niib ga biab niib nëz ley; ni glaaw, lenḷ yu ne riaanḷ glaaraa ga ndxie no. Zeene güeylis zho niib laa niib gutle.

¹⁰ Biet Pabl, bdziḷ me lo niib bdeedz me niib.

—jGdziebde to! —rëb me—. jZrieegan niib!

jNi nligaaw brieegan niib!

¹¹⁻¹² Grëse zho per nli rley zho. Blozh ga bdzieep no glaa stib bdziḷ no lenḷ yu co, dzigoraabdiiz Pabl guietxtil pquiin no. Blozhse bdziuunḷ no xtsee co, laa Pabl psilo bnee lo zho stib, quianeeque Pabl laa liu biini.

Bdziḷ Pabl Milet

13 Lban co psiaaḷ Pabl, laa me wbi ga laa me zie nēz Ason nẓēni me; laa no bziaab barcw bdied-nieer no lo me. Bdziṅ no Ason ga bliaaz no me zigne biaanḡ no diidz.

14 Zeene blanso me lo no, laa no bziaab barcw gza no me bdziṅ no guiedz Mitilen.

15 Biini liu brieē no Mitilen, bdieed no gax Quío, bietraa stib dze co bdziṅ no Samos, ga bliaaz no; bzia no lo nis co zig sti dze dzigoraa bdziṅ no Milet.

16 Biotieete no Efés, sac laa guic Pabl no gdziṅniob me Jerusalén, zeena ygaa me lni Pentecostés.

17 Nacne zigne bdziṅ no Milet pxeel me diidz Efés bredz me grē zha ne zo lo zha ne riladz Jesús ga.

18 Zeene blanso zho, bnee me lo zho rēb me:

—Wen wen runbey to naa, nanle to ganle zha noxco naa noyun naa xtsiin Jesús men ne rnabey ne. Wlal ne psilo ziyal naa nēz Asia nu,

19 blactaa biin naa lo grē miṅe bdeed naa, blactaa lo guieḷxtseeb ne ziyo naa, tibaque quianaḷ grē zha Israel quiṅ zho naa.

20 Per gon to ganle, tibaque bioxco naa bialseed naa to miṅe nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu.

21 Grēse miecha, tibaque miṅe pseed naa zho, miṅe bne naa lo zha Israel miṅcoque bne naa lo miech stib guiedz; grēse zho bnee naa lo zho none csaan zho xquieḷntseeb zho dib zdoo zho gnalo zho Jesús, zeena gbig zho lo Dios.

22 'Scaque niina ne laa Espíritu Sant rnabey ga naa Jerusalén, nanḡ naa dieṅ peraa nac ncuaaneḡ gdzieelo naa ga;

23 per nanpaa naa ible zgo zho naa ladzguiib, ible sacci zho naa, sac guiedz ne gdziintaa naa min co rnee Espiritu Sant teed naa.

24 Lo guielxtseeb co no naa per rquiad zdo naa xquielmban naa; mine nziuraa lo naa laga gdeeda diidz ib laa naa no gne lo miech pa lotaa rleynie Dios zho, zeena ine gley naa csiaal naa dziin ne bzo Jesús naa nu quiaayun naa.

25 Rien naa lo grë to ne nac to zha ne bialseed naa gocnan to zha nac xnëz Dios, gandraa to lo naa lo guidzliu rii.

26-27 Laa naa pseedle to grëse mine nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga.

28 Golguien sca, igolquianap to, ni scagaa golquianap grë zha ne zo to lo! iGolwi ganle xnëz Dios no zho, haxta lo cruz gut Xpëed me bdiizh me xtol zho! Ni stiba, jib Espiritu Sant bzo to yquianap to zho zigne rquianap baxtor xpëcwxiiil zho!

29 'iNsin golso! Sac rienle naa zeene laa naa gbiche lo to, ib zrieequia grë zha ne guiaad guiaadquidie to, zguib zho zha gnitlo zho to zigne run grë coyot mëcwxiiil.

30 Haxta lad to, zrieequia bla zha ntseeb ne ctsëe Xtiidz Dios, squiil zho to tsienal to zhiwseed zho.

31 Gacxe waa laa naa rne lo to, insin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to.

32 Dios nac men ne gacnien to, laa naa rsan to ladznia me grëse to; Xtiidz Ndzon me mine rnee ganle zha nquialadztaa me to, lëew lozh quix biini

to dib zdoo to gnalo to me, zeena yгаа to zaatne gneedz me cuöz to grë to zha ne noraa xnëz me.

³³ Wlaltaa ib rzobladz naa dimi, ib rzobladz naa lar, guiep naa tebaa zha yquianie naa grë ncuaan co.

³⁴ Len dze ne blëz naa lo to, gon to ganle niapse nia naa bdziniaa naa ncuaane pquiin naa, ncuaane pquiingaa grë zha ne bzënie naa.

³⁵ Ga blu naa lo to ganle, ib none dziuun ne dziin zeena grieelo dziuun ne xyudar zha ne guiend pe yquiin. Ib riaanladz naa xtiidz Jesús men ne rnabey ne, zeene znu bnee me: “Mazdraa nroob guielbley ne rgaa zha ne rgad, lëdle zha ne rad.”

³⁶ Zeene blozh bnee Pabl lo zho, laa me pquiitsgzhib ga grë me zho bzodiidznie zho Dios.

³⁷ Blozhse ga, tibga tibga zho wbig bnee zho lo me, bnaaz zho nia me, bdeedz zho me.

³⁸ Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonëz zho me zaatne sëëb me barcw.

21

Biire güey Pabl Jerusalén

¹ Blozhse bzhieen no nia grë zha Efés co, laa no bziaab barcw, laa no zio bdzin no ti lo guidzliu win ne no lo nisdoo colë Cos. Biini liu brieë no ga bdzin no lo sti guidzliu win colë Rodas. Rodas brieë no bdzin no guiedz Pátara.

² Guiedz Pátara, ga bziaab no ti barcw ne zie nëz xtan zha Fenicia.

³ Zeene zieded barcw co ngali zaatne riaan guidzliu win ne lë Chipr, bui no nëz revés rlupaa guidzliu co. Laa no zio haxta bdzin no guiedz Tir,

xtan zha Siria, ga blëz barcw co biet grë yo ne neya.

⁴ Zigne bdziñ no ga bdzieet no barcw bziaab no lad guiedz co, biodziel no grë zha ne rliladz Jesús ga; bliaazaque no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

⁵ Zeene laa no brieë ga, grëse zha ne rliladz Jesús grë tsieel zho grë xpëed zho biaad-zonëz zho no ro nis co; dzigo lo yuzh co ga pquiitgzhib no grë no, bziodiidznie no Dios.

⁶ Blozhse bzhieen no nia zho, laa zho wbi ga.

⁷ Brieë no Tir bdziñ no guiedz Tolemaid, ga bio no bioquiaabdiuzh no grë zha ne rliladz Jesús ga, bliaaz no lo zho tib dze.

⁸ Biini liu brieë no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lëë Lip co ga gocgza sxoop zha ne bzo been xyudar zha poxtl.

⁹ Quianie me tap ndzooop ne gard ctsieelnia, gzase zho bdeed Dios guielbiini lo zho rnee zho tel pe nac mine racladz Dios gacnan miech.

¹⁰ Nzianle dze goc no no lidz Lip, zeene blanso ti men ne ziaad nëz Judé lë Agab, biadquiaabdiuzh me no. (Ye me rnee tel pe nac mine racladz Dios gacnan miech.)

¹¹ Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, në me:

—Znu gon rnee Espíritu Sant gzobdoo zha Israel bizhuan lar rii, co zho me lадznia zha Roma zeene laa me gdziñ Jerusalén.

12 Grë zha ne rliladz Jesús ga, zeene bin zho sca rëb meñ co, rnab zho lo Pabl tsied me Jerusalén, yeque no sca rnee lo me. Mban rac no rdzioon no.

13 Pquiabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleynie naa Jesús. ¡Loxaque rsiaab guieñe to naa i gon squi rac to!

14 Bdzianse no nlid yquiaadiag me xtiidz no, dzigo mazd psaan no, rdzieets no:

—Golgotsaa csaan ne, Diostaa nan dien zha gaca.

15 Bdedse ga bzhixcuaa no laa no brieeg a, laa no zio nëz Jerusalén;

16 blalaa zha ne rliladz Jesús Cesarea ga bzënal zhits no, bzënie zho ti men Chipr lë Mnasón. Izle rliladz me Jesús, lidz me biobiaaz no zeene bdzin no Jerusalén.

17 Grë zha ne rliladz Jesús Jerusalén, rley zho zeene gon zho laa no bdzin, blëzlo zho no.

18 Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne rliladz Jesús Jerusalén ga, ndxie ga.

19 Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniñ Dios me güeyseed me grë miech stib guiedz.

20 Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho miñe rnabey Xley Moisés.

21 Grë zha ne no nu bin zho laa luu güeyseed grë meñ wladz ne no guiedz zit, nac diidz blu

luu lo zho tsienaldraa zho Xley Moisés, codraa zho xpëed zho bey, niicle tsienaldraa zho grë zhiwseed xmenḡol ne.

²² ¿Zha ganle dziuun ne? Sac zeeḡe gon zho laa luu blanso, ible ziaadguib zho luu.

²³ No tap bets ne nu ziaadyoble guḡ zho miḡe bnee zho lo Dios; miḡe gaca güey

²⁴ güeynie zho yadoo, ḡolḡuḡ grë miḡe rnabey ley, bdiizh ctsiib guic to gza to; zeeḡa ga gaḡ grë zha rii ganle nlid grë miḡe rnee miech luu ga.

²⁵ 'Sangue grë miech stib guiedz zha ne rliladz Jesús, laa no pxeelle diidz lo zho zigne bzodiidz ne nu: grë ma ne rut miech rgogon zho lo zhimdio zho, ḡowd zho bëel co; grë ma ne rxieed ren zeeḡe ret ma, ḡowd zho ma; ni niicle grëḡaa ma ne gut zho, ib ḡowd zho xchen ma; grë zha bḡui, nodne tsonie zho wnaa ne nacd tsiel zho; niicle wnaagaaw, nodne tsonie zho mḡui ne nacd tsiel zho.

Bnaaz zho Pabl

²⁶ Laa Pabl zienie gza zha co. Biini liu güey me gza me zho güeyḡuḡ zho miḡe rnabey ley; blozh ga güey zho yadoo güeynie zho diidz pa dze gza miḡe quiayun zho ga, zeeḡa ḡal dze co laa zho tsienie gon ne gdeed zho tib tib zho.

²⁷ Laa zeeḡe merle gza gadz ngbidz ne quiayun me miḡe rnabey ley ga gza me zha co, lega naclew ḡon bla zha Israel ne ziaad nëz Asia laa me no len yadoo. Nacne wbig zho

²⁸ bzheḡ zho zhicw me, roptsie zho rnee zho:

—¡Grëse to menḡuiedz! ¡ḡolḡuḡ xyudar no gnaaz ne men rii! Sac lëë me ga quianzë quiaseed me zha wladz glëënie zho ladz zho, rnee me lo zho

gundraa zho grë miñe rnabey ley, gapdraa zho respet yadoo rii; haxta grë zha zit zizëëbnie me nu. ¡Noguitniele me lugar nda rii!

²⁹ Sca rnee zho, sac gon zho Pabl len guiedz Jerusalén ga ziegrop me ti zha Efés lë Trófimo, dzigo rzac zho güeynie me zha co len yadoo.

³⁰ Pe ga bin grë menquiedz, grëse zho bdziñ wbigbe zho lo Pabl bdoñni zho me blee zho me len yadoo, zigne blee zho me ga lëëlëd psioog zho ro yadoo; psilo zho noguiñ zho me, nan zho gut zho me.

³¹ Zeene gocnan men ne rnabey lo menquiib ne ndxie ga laa ruid co noyac,

³² lëëlëd brieenie me grë xmenquiib me ni grëraa zha ne rnabey lo zho. Zeene gon grë zha ne noguiñ Pabl ga, laa grë menquiib co bdziñ, dzigora blëz bdiñ zho me.

³³ Dzigo wbig men rnabey co, bnabey me grë zhaguiib co bzoob zho Pabl chop caden. Bnabdiidz me lo grë miech co dieñ cho nac Pabl, pe quiayun me ne scataa rlëënie zho me.

³⁴ Psilo zho nguiedz roptsie zho, zhaase zhaase ncuaane rcaadzdoñ zho me. Gonse men rnabey co rlud dieñ pepaa rlisqui zho, nacne bnabey me grë menquiib co ziesañ zho Pabl yu ne rbëzpa zho.

³⁵ Laa grë menquiib co csilo soquianie Pabl lo scaler ne rdziñ ro yu co, gataa mazd bzoobyañ zho me, sac ntseeb rac grë miech co;

³⁶ nalbe zho, roptsie zho rnee zho:

—¡Golnitlogazh men qui! ¡Ninagazh golgut me!

³⁷ Laa grë menquiib co csëëble me len yu co, zeene bnee me lo men rnabey co, rëb me:

—¿Pe zrieelo gne naa ti xtudz naa lo luu?

Dzigo rëb meṅ rnabey co:

—¿Mod rac luu rnee luu xtiidz zha Gres?

³⁸ ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nëz dan.

³⁹ —Led naada —rëb Pabl— meṅ Israel nac naa. Guiedz Tars gol naa, lëë guiedz co nac miṅe nroobraa lo grë guiedz ne ngab Cilis. Na laa naa rnab lo luu, beṅ guielnzaac bneedz diidz gne naa chop lan xtidz naa lo grë miech qui.

⁴⁰ —Zaca —rëb meṅ co.

Lo scaler co zo Pabl blunia me lo grë miech co cuedze zho. Zeṅe laa zho biacdze, dzigo psilo me bnee me xtiitsë me grë me zho, rëb me:

22

¹ —Grëse to meṅ wladz, laa naa rzaac to zig ti bets naa zig pxozgaa naa, golquiaadiag miṅe gne naa nu ganle zeeṅa gacnaṅ to quiayund naa miṅe rquiaqui to naa.

² Zeṅe gon zho xtiidz zho rnee me, grëse zho dzese bre zho; dzigo rëb me:

³ —Meṅ Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc meṅ ne pseed naa. Pseed me naa grëse zigne nac xley xmenṅol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow.

⁴ Miṅe beṅ to nu nadze, ye naa blactaa squi beṅ naa ptsidil naa grë zha ne rliladz Jesús, pquianaṅ naa ygaa zho guet zho; mgui wnaasaque razobdoo naa zho lidz zho rasan naa zho ladzguiib.

⁵ Men ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca beñ naa; sac zha bneedz ti xtiidz zho bi naa ndziñnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no garliladz Jesús, nialnie naa zho Jerusalén nu nded zho caxtigw.

⁶ 'Min copaa nagon brie naa nu za naa nëz co. Zhile gdziñ naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa.

⁷ Biabgazh naa liu, ga nix naa bin naa ti tsi men co rnee me lo naa: "Saul, Saul, ¿pe nacne quianañ luu naa?"

⁸ "¡Been guieñzaac bnë dien cho luu!", rep naa. Dzigo në men co lo naa: "Naa nac Jesús men Nazaret ne squi quiatsidil luu."

⁹ 'Grë zha ne zanie naa ga, bdzieb zho gon zho biini co, per biend zho pe rnee men co lo naa.

¹⁰ Dzigo rep naa lo me: "Bzhiguieñ bnë dien, ¿pe racladz luu gun naa niina?" Nëchaa me: "Guche i, güey Damasc ga gnë zho ganle pe nac mine no gun luu."

¹¹ 'Dzigo bzhen zha ne zanie naa ga nia naa, bdziñnie zho naa Damasc; sac lo biinidoo co pcow lo naa.

¹² Ga no ti mgui lë Ananí, zëeb diidz rioxco me grë mine rnabey ley, grëse men wladz ne no ga nanpaa zho ti men wen nac me;

¹³ dzigo biaad me zaatne blëz naa ga, në me lo naa: "Saul, niinagazh gon bets laa luu gbiire gwi stib." Zigne sca bnee me laa lo naa biac, gonggazh naa me.

¹⁴ Dzigo nëchaa me lo naa: "Dios men ne bliladz grë pxozgol ne, ib men co bzooblo luu gacnañ

luu pe nac miñe racladz me gac, me bzooblo luu guñbey luu men ne nacle diidz ga cxeel me lo guidzliu, ni gon luu tsi men co.

¹⁵ Ib laa me bzo luu tsienee luu lo miech miñe bzhaac luu ga, miñe bin luu ga.

¹⁶ Guso i sca, zeena chobnigazh luu. Dib zdo luu bredz Jesús, bnab lo me csañmbe me luu lo xtol luu.”

¹⁷ Zeene laa naa blanso Jerusalén nu, tib dze lëëtaque no naa yadoo nozodiidznie naa Dios,

¹⁸ tibaque blulo me lo naa në me: “Na zeena biobladz brie Jerusalén nu, sac ib gliladz grë miech rii miñe gnee luu zeene gnee luu xtidz naa lo zho.”

¹⁹ “Per runbey zho naa waa”, rep naa lo me, “nañpaa zho scataa ra naa grë yadoo raxizhoo naa grë miech ne riladz luu, rnabey naa rguin zho zho ni rio zho ladzguiib,

²⁰ niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquiianaap naa xab grë zha ne bdeedquie me.”

²¹ Dzigo në me lo naa: “Na zeena pcaaniob nëz brie nu, sac gon laa naa cxel luu stib dan tsienee luu xtidz naa lo grë menzit.”

²² Zeene bin zho sca rëb me bdeetraa zho diidz nee me, psilo zho nguiedz roptsie rnee zho:

—¡ib rieguialdraa gban men qui! ¡Golnitlogazh me!

²³ Nguiedz zëeb tsi zho, ib rioogd ro zho, masaque rdzib zho xab zho ni rchoon zho yudie laglaa.

²⁴ Dzigo psëeb men rnabey co Pabl len yu co, ni bnabey me grë menquiib co quin zho Pabl, zeena

cueero Pabl dien pe nac ncuane been Pabl, zha nac ne scataa rac grë miech co lo Pabl.

²⁵ Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nlipaa no xfalt zho?

²⁶ Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

²⁷ Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

²⁸ Rzedz yan men rnabey co rëb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbcha Pabl:

—Sangue naa, desde gol naa bgab naa lo zha Roma.

²⁹ Grë zhaguiib ne bzo nguin Pabl ga parne cueero me, lëëlëd wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguin zho ti zha Roma.

Bnee Pabl lo wxtis Israel

³⁰ Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhi-wxtis zho, sac racladz me gacnan me dien pepaa nac ncuane rquiaqui rlëenie grë miech co Pabl.

Dzigo pxadz me Pabl, blee me Pabl bzo me Pabl lo zho.

23

¹ Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanałd naa ncuaane rdziguiend me.

² Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Golcap ro zha qui!

³ Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhitssew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

⁴⁻⁵ Pquiabbe zha ne ndxie ga rëb zho:

—¡Bieñ ganle lo pxoz nroob i, lo men ne quiayun xtsiin Dios i noquiabro luu!

—Golgun dispensar —rëb Pabl—. Nañd naa lëe pxoz nroob i, tel niaca mine nañ naaw ne scad naa; sac zhubnee lo Xtiidz Dios: “Gneenëd luu zha ne rnabey ladz luu.”

⁶ Zeene bien Pabl groł zha wxtis co zienal zhiwseed zha saducé, zgroł zho zienal zhiwseed zha farisé, dzigo psilo me nguiedz bnee me rëb me lo zho:

—¡Grëse to bets, golgona ganle, zha farisé nac naa, niiclegaa pxoz naaw farisé goc me! ¡Ni porne rililadzpa naa gon zrieeban zha ne ret, min co gane znu zo naa lo to nu!

⁷ Zeene sca rëb Pabl, psilo zho bdil̄diidz zho. Goc zho chop dii,

⁸ rriee zha saducé rnee nlid grieeban zha ne ret, nlid no anjl, nlid no espíritu; laa zha fariséga na rnee zrieeban miech, no anjl ni no espíritu.

⁹ Nguiedz zëeb tsi zho noneelsa zho, dzigo gu-soque bla maistr ley ne nacgrë zha farisé, rëb zho:

—Laa ne bdzianle ganle, jni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

¹⁰ Zeene gon men ne rnabey lo men̄guiib ga, laa lo xtil̄ zho noyac nroobraa, bdzieb me rëb me nend znuse gzhiih zho Pabl; bnabeyaque me gocredz men̄guiib güeyxi zho Pabl biire güeysan zho me len̄ yu ne rbëz zho ga.

¹¹ Gol̄ guieel co, blulo Dios lo Pabl rëb me:

—Gdzieebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

Gocladz zho niut zho Pabl

¹²⁻¹³ Zeene biini liu, ndziibsræa choo zha Israel bnediidz rëb zho gowd zho, ni tib ro peet guied zho haxta gut zho Pabl; tel̄ne gund zho miñe rnee zho maase csiaabzi Dios zho.

¹⁴ Dzigo güey zho lo pxoz ne rnabey, lo grë zha ne nac zha non lo men̄guiedz, bzodiidz zho miñe no guic zho ga, ni rëb zho:

¹⁵ —Nana gon, gol̄nab lo men̄ ne rnabey lo men̄guiib cxeel̄ me Pabl lo to gzhe, gol̄quiaalo noræa pe lozh yquiep to Pabl; laa no nsinle ziobmbiaaz. Zeene laa zho tednie Pabl, ga dziuut no Pabl.

¹⁶ Dieen zha bin ti xingan bzian Pabla, nacne lëëlëd güey win yu ne rbëz meṅguiib ga güeynie win diidz lo Pabl.

¹⁷ Dzigo bredz Pabl ti zha ne rnabey lo meṅguiib co, rëb Pabl lo zho:

—Bzhiguiel güeynie mëed rii lo meṅ ne rnabey to, sac laa win no tsienie ti diidz lo me.

¹⁸ Bzhen meṅ rnabey co nia mëed co, güeynie me win lo meṅ nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzguiib ga bñab lo naa guaialnie naa win.

¹⁹ Dzigo bzhen meṅ rnabey co nia win, güeynie me win stib nëz, bñabdiidz me lo win dien pe nac diidz ne zienie win lo me.

²⁰ Dzigo rëbcha win:

—Laa zha Israel gon bñediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me.

²¹ Bzhiguiel gliladzd luu xtiidz zho, sac ndzi-ibsrää choo zha ne nacgrë zho rëb zho laa zho tsiesoblan nëz gutgagh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho guṅd min co maase gdzibdee Dios zho. Ible zun zhow, loxaque quiambëzse zho dien pe guiab luu.

²² Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

Güey Pabl lo gobernador Wech

²³ Lëëlëd bredz meṅ rnabey co chop zha ne zo lo meṅguiib, rëb me:

—Laa zhaguuib gon none grieeg naguieel tsie zho Cesarea, na zeen golzo zha ne tsie; none tsie chop gayoo zha ne seni, tsongal tsii zha ne sob guay, schop gayoo zha ne güey lanz. Naguieelgazh, zig rlozh xtsee none grieeg zho nu;

²⁴ sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziñnie to me lo gobernador Wech Cesarea.

²⁵⁻²⁶ Dzigo pquiaa me ti guits ne güey zho gdziñnie zho lo gobernador, rneew:

“¡Diuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho men qui zaatne zob luu i.

²⁷ Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguuib güeyla me lo zho.

²⁸ Gocladz naa niacnan naa dien zha nacne rlëenie zho me, dzigo bianie naa me lo zhiwxtis zho.

²⁹ Ga gon naa led ncuaane rnad rlëenie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzguuib.

³⁰ Zeene gocnan naa laa palal zho bnediidz gut zho me, nacne bnabeyaue naa ziaadsan gre menguiib qui me lo luu i. Niiclegaa zha ne rlëenie mew, laa naa rep lo zho guiaad zho lo luu i, zeena i gnë zho dien zha nacne rlëenie zho me.

’Lëed bii gdzieel ne sca dien.”

³¹ Zeene laa liu pcow, zig rlozh xtseew laa gre menguiib co pcanie Pabl nëz; dib guieel bio zho nëz bdziñnie zho me guiedz Antípatris.

³² Biini liu, loxaque zha ne zob guay ga pcaa nēz zienie zho me Cesarea, laa grēraa meṅguiib co wbire bdziṅ Jerusalén stib.

³³ Zeēne bdziṅ zho Cesarea, bdeed zho guits ne zienie zho ga lo meṅ ne nac gobernador, dzigo laa zho psan Pabl ga.

³⁴ Blozhse blab me lo guits co, dzigo bnabdiidz me lo Pabl dieṅ pa guiedz gol Pabl. Dzigo rēbchaa Pabl lo me, zha Cilis nac Pabl.

³⁵ —Nasca —rēb me—, zeēne laa zha ne rlēēnie luu glanso nu, dzigo yquiaadiag naa dieṅ zhapaa nac xtil to.

Dzigo bnabey me, pquianap meṅguiib Pabl za-atne nac leṅ xyulow Herod.

24

Gocredz Pabl lo gobernador Wech

¹ Zeēne goc gaay ngbidza, laa Ananí meṅ ne rnabey lo pxoz bdziṅ ga, gza me blalaa zha ne nac zha non lo meṅguiedz Israel, zienie zho ti licenciad lē Tértulo; grē zho laa zho zie zienie zho diidz lo gobernador pe nacne rdilnie zho Pabl.

² Dzigo bnabey gobernador gocredz Pabl. Zeēne laa Pabl bdziṅ, psilo licenciad co bzeet me grē ncuaaṅe rquiaqui zho Pabl, rēb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban meṅladz no niina, blactaa ncuaaṅe yquii lo no noyuṅ luu.

³ Rzac zdoo now, tel pa lotaa zo no rsoladz no luu nac luu meṅ ne rnabey no.

⁴ Nli nonguiel_{da} dziun_{need} no luu, per been_{ti} guiel_nzaac p_quiaadiag gan_{le} pe nac ncuaane_rlisqui no quiayun_{mgui} ne zo lo ne nu.

⁵ 'Masaque nac me lo no zig nac ti guiel_guidz dox ne rded, grëse guiedz quianzë me noyungüet me men_{ladz} no gacndaan zho lo men_{ne} rnabey no. Lëe me ga zo lo grë zha ne rnee zho nazaren.

⁶ Zeene bгаа me, lëëtaque laa me no len_yadoo ro ne zob Jerusalén quiayun_{guzee} me xyadoo no. Nacne gocladz no gagazh nguizh me falt co zigne rnabey xley no;

⁷ per biaad Lisias grë xmenguiib me ntseeb rac zho biaadla zho me lo no.

⁸ Na nagon_{zac} luuzhal yquiep me, zeena gan_{luu} gan_{le} nli quiayun_{me} grë mine_{rnee} no nu.

⁹ Grë zha Israel ne zienal_{ga}, p_quiabbe zho rëb zho nli quiayun_{me} grë min_{co}.

¹⁰ Dzigo blunia men_{ne} nac gobernador ga lo Pabl gnee Pabl; nacne psilo Pabl bnee me rëb me:

—Nan_{le} naa ziele iz zob luu nu r_quiaadiag luu grë ncuaane_{rac} xtan no nu, gane rley naa zial_{naa} lo luu par y_quiaadiaggaa luu gan_{le} zha nac xtudz naa.

¹¹ 'Na rac tsiipchop ngbidz ga bdzin_{naa} Jerusalén, biagan_{naa} Dios len_yadoo nroob ne zob ga (niicle tel_{niaca} mine_{griee} diidz gan_{le}).

¹² Laa naa bia Jerusalén biagan_{naa} Dios, choot biatil_{nied} naa ga; niicle len_{grë}ragaa yadoo wina, ro nëzgaaw, wlaltaa noquiild naa miech cho lo gacntseeb zho.

¹³ Grëse mine_rquiaqui grë zha qui naa grieelod glu zho nliw, sac led ncuaane_{godca}.

14 'Mīne nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanał naaw, dib zdoo naa quiayun naa dziin lo Dios men ne bliladz pxozgol no; ni scaquegaa, noxco naa grēse mīne nac ley. Rliladz naa grēse mīne bnee grē zha ne biadteed xtiidz me.

15 Rliladz naa zdziñ dze ne cueeban Dios grēse miech, zigtaa zha wena zigtagaa zha ntseeba, ni haxta zha ye zho rliladz miñ co.

16 Ni miñ copaa nagon gane tibaque noxco naa guiaanmbe zdoo naa, guntaldraa naa xtol naa zigtaa lo Diosa zigtagaa lo samiech naaw.

17 'Nod naa Jerusalén tibaque, blale iz goc no naa ladz menzit; dze ne bdziñ naa Jerusalén ga, laa naa bia porne zasan ti gon lo menladz naa ni zanie naa ti gon ne gded naa lo Dios.

18 Miñ co nagon nacne no naa len yadoo zeene gon grē zha qui naa. Blozhle ben naa grē mīne rnabey xley no rdziuun no zeene sca riosan no gon, zeene laa bla zha Israel ne no nēz Asia blanso lo naa ga; per choot miech taf ndxienied naa ga, niicle choot noquiildgaa naa.

19 Zha co nagon rieguał niaad nu, nlisqui zho tel pe ncuaane rzac zho nonguield noyun naa ga.

20 Zha ne ndxieгаа nu niina, zac gnē zho telne briequia falt ne rquiaqui zho naa zeene gocredz naa lo wxtis Jerusalén.

21 Te goon falt ga naye ben naa, lēē gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa zdziñ dze ne grieeban miech." Scase nagon naca.

²² Nanle gobernador co led ncuaane gund zha ne riladz Jesús ga rquiaqui zho Pabl, dzigo bnee me lo zho cuéz zho nieeda gdziñ Lisias, dzigo dien zhapaa guiaan xtil zho.

²³ Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grë zha ne ndzieeldiidz Pabl tsiegan zho Pabl.

²⁴ Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús.

²⁵ Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me bdzieb, rëbchaa me lo Pabl:

—jLëëlewga na nadien! Na zeene guioba, dzigo naazhal cuedz luu guiaad luu zidiidz ne stib.

²⁶ Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

²⁷ Zeene goc chop iz sca no Pabl ladzguiib ga, laa Wech brieë guielgobrador, bzëëb ti men lë Pons Fest. Niicle brieë Wech per psilaad me Pabl, sac racladz me dien zha guianziuura me lo grë zha Israel.

25

Güeyzo zho Pabl lo gobernador Fest

¹ Zeene goc tson ngbidz bdziñ Fest Cesarea pcaania me guielgobrador, laa me brieë güey me Jerusalén.

² Grë zha pxoz non ni grë zha ne rnabey lo menguedz Israel, zeene bin zho laa Fest bdziñ

Jerusalén lëelëd güey zho lo me güeyxob zho xde-
mand Pabl; ni

³ bñab zho lo me cxeel me Pabl Jerusalén. Laa zho rñab miñ co sac laa zho bñediidzle, nëz tsiesoblan zho, yquiambëz zho ted Pabl gut zho Pabl.

⁴⁻⁵ Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire güey nëz co dzigo zac tsienal zho zhits me.

⁶ Ndziibsrää ti zhmal blëz me Jerusalén ga, dzigo laa me biire zey Cesarea. Zna dze bdziñ me bi-inigazh liu co güey me yulow, bnabey me gocredz Pabl.

⁷ Laa grë zha Israel ndxiele ga, wbig zho lo Pabl ndal grë falt nroob ne rcaadzdoł zho me, per loxaque diidzsew, guiend zha glu zho ne nlipaa goca.

⁸ Dzigo pquiab Pabl rëb Pabl:

—Grëtaa mine rquiaqui zho naa i, ni tiba nliid. Wlaltaa gard quits naa xley no, gard quitnie naa xyadoo no, niicle gardгаа gacntseeb naa lo zhiwx-tis zha Roma.

⁹ —¿Pe racladzdгаа lüu tsie lüu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap dol.

Sca rëb me, sac racladz me dien zha guianñziuu me lo grë zha Israel.

¹⁰ Dzigo rëbchaa Pabl:

—¿Gad naa! ¿Nod pe nac ga naa ga, to rieguial gun guielwxtis rii! Benque nan wen lüu ganle peet falt nzëëbd naa lo zha Israel.

11 Tel̄ niaca miñe nli ziyun̄ naa pe guiel̄ntseeb ne raguial̄ naa guet naa, maase guet naa. Per na nan̄paa naa ni ti ncuaane rquiaqui zho naa i nlid, ¿pe nac dzigo cho co naa ladznia zho gut zho naa? Laa naa racladz, mazd gōneedz diidz tibaque ga naa lo zhiwxtis nroob ne, men̄ ne zob Roma.

12 Dzigo bzodiidz Fest grē me men̄ rac ne nacnie me dziin; blozhse ga rēbchaa me lo Pabl:

—Guiend̄ rson sca. ¡Tel̄ lo César racladz luu tsie luu, na maase tsie luu!

Gocredz Pabl lo Agrip

13 Zeene goc bla zhmala, laa rey Agrip grop wnaa ne lē Berenis bdziñ Cesarea ga güeyquiaabdiuzh me Fest.

14 Nzianlaa ngbidz blēz me ga, dzigo bzodiidz Fest lo me laa Pabl sca no ladzguuib̄ ga, rēb Fest:

—Len̄ dze ne bii nac Wech dziin biab ti mgui ladzguuib̄ nu,

15 laa len̄ dze ne bia naa Jerusalén biaad grē zhipxoz non zha Israel, grē zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me.

16 Dzigo rep naa lo zho led scad run̄ zha Roma guiel̄wxtis, ib none gacredz me gnee me chop lan xtiidz me lo grē zha ne rzoob xdemand me, ga glu tel̄ne nli miñe rquiaqui zho me togo nlidgaaw;

17 nacne biaad zho nu. Zna dze blanso zho, biinigazh liu co bnabey naa gocredz me.

18 Tibaque ni naa bod no pe ti falt nroob ne rquiaqui zho me, per zeene biaad zho yulow gon̄ naa

19 lēē gdib tel̄ zha nac grē ncuaane rliiladz zho miñ co rlisqui zho, ni rlisqui zho pe nacne zienal̄

me zhiwseed ti mgui lë Jesús, gutle meñ co ni laa me rnee mban me.

²⁰ Zeene gon naa grë ncuaan co rquiaqui zho me nli rienđ naa zha gun naa, dzigo rep naa lo me, telne racladzgaa me zac tsie me Jerusalén ga dien zha guiaan lo xtil zho.

²¹ Per bnëd me, lel bñab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

²² Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegagh gnabey naa gacredz me.

²³ Biini liu, ti lni nroob ne rac laa Agrip ni Berenis bdziñ len yu ne rac guielwxtis ga, grë zha non ne rnabey lo menğuib, grë zha non lo menğuedz, nal zho zhits me. Dzigo bnabey Fest gocredz Pabl, zeene laa Pabl bdziñ

²⁴ laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëe meñ rii nagon rlëeniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me.

²⁵ Sangue naa gonle naa rapd me falt, par guiab ne rieguial guet me; per laa me bñab tsie me lo César, na laa naa no cxel me nëz co.

²⁶ Nli rienđ naa dien pe nac diidz ne cxel naa lo César, ne squi lega ncuaane nlid rquiaqui zho me. Miñ co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzë xtiidz me; zeena togo

zdział naa pe nac diidz ne cxel naa gal dze ne laa me tsie nēz co.

²⁷ ¡Sac nonguield ga gun naa telne sobdoo me cxel naa me, ni tel cxeld naa diidz dien pe nac xfalt me!

26

Bnee Pabl lo Agrip

¹ Dzigo rēb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rēb Pabl:

² —Rley naa gon rey Agrip ne laa naa zial lo luu nadze, zeena gzodiidz naa lo luu gacna luu ganle nlid grē ncuane rquiaqui grē menladz naa naa.

³ Rley naa sac naa naa naapaa luu zha nac grē xcostumbr no, grē ncuane rliladz no. ¡Rnab naa lo luu sca, guieete luu yquiaadiag luu grē mine gne naa!

⁴ Grēse zha Israel naa wen zho ganle zha mban naa, sac mēēdlas naa bdzi naa Jerusalén, ga broob naa.

⁵ Naapaa zho zha farisé goc naa, ni zha farisé nac zha ne rioxcoraa run grēse mine rliladz zha Israel.

⁶ Per mazd gon, laa zho rlēē lo naa porne dib zdoo naa rliladz naa laa Dios beenle mine psan me diidz lo grē pxozgol no.

⁷ Grēse zha Israel, zigne ziaad zho lo gza tsiip-chop dii ne psan xmen gol no, grēse zho dze guieel bii quiambēz zho gac min co. ¡Masaque rzac zho dol ga quiayun naa rliladz naa laaw gogle!

⁸ Haxta to, zeene rzet naa zrieeban miech, rzhidz to ron tow, ¿pe rzac to naa grieelod Dios gun me min co?

⁹ 'Glo nli ptsidil naa grë zha ne rliadz Jesús men Nazaret, masaque rzaac naa lëew ga quiayun naa.

¹⁰ Pe zhidaa zha ne blo naa ladzguiib Jerusalén, haxta grë pxoz non bneedz diidz beñ naa grë min co; ni zeene rnabey zho ret grë zha co, ye naa rded diidz ret zho.

¹¹ Nzian grë yadoo win bia naa, biasacsi naa zho haxta gneenë zho Jesús. Blëëniedox naa zho, haxta grë guiedz zit bia naa biaguib naa zho.

¹² 'Min copaa nagon brie naa za naa guiedz Damasc, masaque grë pxoz rnabey bneedz ti xti-idz zho bi naa laa naa za.

¹³ Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz.

¹⁴ Grëse no biab liu, dzigo bin naa ti tsi men co rnee me xtiidz no, bredz me naa në me: "Saul, Saul, ¿pe nace quiana luu naa? Lëëque luu gon nosacsi luu i, rzac luu zigne rzac ngon ne rcaanni, ni lëëque lo guiib lots ne rtseb zho ma riecaanni ma."

¹⁵ Dzigo rep naa: "Been guieinzaac bnë dien cho luu." Nëchaa men co: "Naa nac Jesús, men ne squi quiatsidil luu.

¹⁶ ¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu.

¹⁷ Peet tsienied guic luu, naa yquianaap luu, nicle zhaladz luuw niiclegaa zha zita peet grielod gun zho luu. Sac laa naa cxel luu grë guiedz zit

¹⁸ tsienee luu lo miech gacnan zho mine nacpaa

diidzli, zeena grieë zho lo ncow gbig zho nöz lo biini, grieë zho ladznia mendox ygab zho lo Dios. Dib zdoo zho gliladz zho naa zeena guñ Dios zho perdon, ni ygaa zho zaatne gdziñ grëse zha ne mbe zdoo.”

¹⁹ Miñ co nagon rey Agrip nacne bioxco naa ben naa miñe nē men co lo naa ga.

²⁰ Glose Damasc psilo naa bne naa lo miech, ga brie naa bdziñ naa Jerusalén, bia naa dib Judé ni grë guiedz zit, bne naa lo miech csaan zho grë xquieIntseeb zho gbig zho lo Dios.

²¹ Miñ co nagon nacne rlëenie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa.

²² Gocniën Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne miñe bzeetaque Moisés ni grëragaa zha ne biadteed xtiidz Dios padzeela.

²³ Tel zha, bzeetle zho ib sacsi miech men ne cxeel Dios ga, ni me gac men ne glopaa grieëban, me gac zig ti biini ne gziini lo grëse miech, zigtaa zha Israela zigtagaa grë menzita.

²⁴ Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

²⁵ —Coo, gobernador Fest —rëb Pabl—, led rzhind guic naa. Niapse miñe nac diidzli miñ co none naa,

²⁶ laa rey Agrip zob i, me nan ganle nli grë miñe rne naa nu. Tibliladz naa none naaw lo me, sac nanopaa naa nan me nli miñe rnee naa, nacda ncuaane goc ngueets zhlian.

²⁷ ¿Led nli lëë rey Agrip rllladz luu miñe bzeet grë zha ne biadteed xtiidz Dios padzeela? Nañpaa naa rllladz luuw.

²⁸ Pquiab rey Agrip, rëb me lo Pabl:

—¡Zlalaque nu gon laa luu cole guic naa ye naa sëëb xnëz Jesús!

²⁹ Dzigo rëbchaa Pabl:

—¡Nend zhilew o nroobragaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag miñe none naa nu niina; zeeña ygaa to miñe bgaa naa nu, per led znud sob caden rii nia to!

³⁰ Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brieega.

³¹ Grëse zho rnee peet xtold Pabl, rapd me falt ne guiab ne riegual guet me, riegualgaa tso me ladzguiib.

³² —Niacpaa nsilaa ne me —rnee Agrip lo Fest—, telne nabd me tsiepaa me lo César.

27

Pxeel zho Pabl nëz Roma

¹ Bdzin dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo menquiib lë Jul, gza Pabl zlalaa zha ne no ladzguiib ga. Lëë Jul co rnabey lo tib dii menquiib ne rnee zho “Augusto César”.

² Ye no zional zhits Pabl grop no Aristarco, laa no bziaab ti xbarcw zha Adramit zie grë guiedz ne ndxie ro nis nëz Asia, laa no pcaa nëz laa no zio.

³ Biini liu co laa no bdzin guiedz Sidón. Zeene bdzin no ga, wen goc Jul lo Pabl bdeed me diidz

güey Pabl güeyquiaabdiuzh Pabl grë zha ne runbey Pabl ga, grëse zho rleyne zho me blëzlo zho me.

⁴ Ga brieë no bdieed no tib ro guidzliu win ne lë Chipr, psaac guidzliu co palal, sac psilo rrieë me rtsire me barcw ne zio no ga.

⁵ Laa no zio, bdieed no gax ro guidzliu ne nac xtan zha Cilis ni xtan zha Panfil, bdziñ no ti guiedz ne ndxie xtan Licia lë Mira;

⁶ ga bdzieet no barcw ne zio no ga. Lëëtaaque noguib Jul sti barcw ne guio no, laa ti xbarcw zha Alejandrí no grieë ga tsie nëz Italia, dzigo bziaab no barcw co laa no zio stib.

⁷ Tsow ga zie barcw co, nzian dze goca, nen dzig-oraa bdziñ no gax guiedz Gnid; ib rbëzdaque me, nacne bguib zho dien pa nëz zhi rcaañ me, dzigo güeynie zho barcw co nëz Cret. Tib ro guidzliu win co zio no bdieed no Salmon;

⁸ nen bdziñ no zaatne rnee zho Buenos Puertos, gaxle ga riaan ti guiedz lë Lasé.

⁹ Nrooble dze goc no no lo nis, leñ dze co laa mëë nañ psilole ni zëëb diidz gacd së barcw leñ mëë co, nacne bnee Pabl lo grë zha ne zienie no ga,

¹⁰ rëb me lo zho:

—Golgona ganle, telne laa ne grieë nu leñ dze rii, rgobey naa ib znitlonie ne barcw rii lo nis.

¹¹ Laa ne niacnie Jul Pabl niac miñe rëb Pabl ga, leñ mazdraa bliladz me xtiidz zha ne rsëë barcw ni men ne nac bizhuana.

¹² Stiba, zaatne nac Buenos Puertos ga rapda zaatne zaacse cuëz miech leñ mëë nañ, nacne nzian zho rëb mazd gdziñ guiedz Fenice, ga zac gbiaaz no gdipse leñ mëë nañ. Ro guidzliu win co riaan Fenice, nligaa zhi rcaañ me ga.

¹³ Zeene laa ti me win ne znu ziaadquia psilo brie lo nis co, zootle na nli grieddraa me. Nacne lëëläd bnabey zho bziaab no barcw, blisglaa zho lar nroob ne rcaan me rzëw, laa no zio, gax gax ro guidzliu co zienie zhow.

¹⁴ Zhisaque goca zeene laa ti me dox ne rnee zho Nordest psilo brie, laa me co psilo rtsire barcw.

¹⁵ Niicle racladz zho tsienie zhow nëz ne no guio no ga, per rsaand me; gonse zho led ncuaane gacda, mazd psaan zho zienie mew nëz ne racladz-taa me.

¹⁶ Scale zienie me barcw ne no no ga, biotieed no gax ro guidzliu win ne lë Clau^{da}, ga në në brieelo blis zho grë canó win ne nal zhits barcw ga bzëëba nëz len barcw;

¹⁷ dzigo blibdoo zho barcw co zeena gbilda, ni blit zho lar nroob ne rcaan me rzëw, sac rdzieb zho rëb zho telne scaquia lar co nend tsieniezhoo mew nëz ro nis, pa tsiesobnagwa lo yuzh.

¹⁸ Zeene biini sti liu co mazdraa rrie me, ni guiexoo ne ziaadnie me, nacne blee zho grë yo ne no len barcw blaal zhow lo nis.

¹⁹ Goc bion ngbidz scataa zo guie dox co, bnabeya^{que} zho blee no grëse ncuaane runxtsiin zho len barcw blaal now lo nis.

²⁰ Goc bla ngbidza rbëzdaque guie dox co, rlu-draa lo mel per ni lo ngbidz rludraa, dzigotaa rdzieets no nlidraa griequiaa no.

²¹ Niicle wagw choot rsoladzdraa, dzigo bnee Pabl lo grë zha ne zio^{grë} no ga, rëb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grë ncuaane nodziaⁿ ne nu, niicle nlaaldgaa ne grë yo co lo nis.

22 Per laa ne znule bzhiaac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd.

23 Led nanle to ganle, xnëz Dios no naa ni xtsiin me noyuu naa, nieewdze pxeel me ti xanj me

24 në lo naa: “Gdziebd luu gon Pabl, peet gacd luu, sac ib none laa luu gdzin lo rey ne zob Roma. Niicle grë zha ne ziadgrëe luu len barcw i peet gacd zho, sac bin me mine rnab luu.”

25 Gane rne naa lo to peet tsienied guic to, nanle naa csaand Dios ne, ible zac mine në anj co lo naa.

26 Ib tedsod, no pa ti lo guidzliu win ne no lo nis rii tsiezo me rii ne.

27 Zeene goc tsiida ngbidz sca nëzrii nëzrec zienie me no, laa no no lo Nisdoo Adriático. Wdze co, zig groj guieela, bien grë zha ne rsëe barcw ga gaxle ti ro guidzliu ga nonie barcw no;

28 dzigo ptiix zho dien palal quiet nis ga, gon zho loxaque gal yas guieta. Bzë zho spalal biire ptiix zhow stib, gale guieta loxaque tsiiptib yas.

29 Gataa laa zho bdzieb rëb zho nend pa tsiecaan barcw lo quie, dzigo psilëe zho lo doo ne zob gza tap guiib cruz nroob ne quia nëz zhits barcw, bron zho gza guiib co lo nis, zeena tsowga së barcw; rzac zho tebaa laa liu biinile.

30 Grë zha ne run dziin len barcw, gocladz zho nzhoon zho, psilo zho noxadz zho grë canó win ne ney barcw, rquiaalo zho zig nac zeene guiib cruz nroob ne ney barcw nëz quiaaw qualit zho csëeb zho len nis.

31 Zeene gon Pabla, rëbcha me lo Jul ni lo grë xmenguiib Jul:

—¡Laa grë zha rii gon racladz xoon! Csaande to, sac telne laa zho xoon nlidraa grieequia to lo nis rii.

³² Dzigo pchug grë men̄guiib co doo ne zob grë canó win co, bron̄ zhow lo nis.

³³⁻³⁴ Silgaw, bii ncow rnaw laa Pabl bnee lo zho gow zho, rëb Pabl:

—¡None gow to! Gołwi gan̄le nale gac tsiin̄ ngbidz ga ni ti lë peet gard gow to, ni squique raguiesde to zaacse. Peet tsienied guic to, ni tib to peet gacd.

³⁵ Blozhse sca bnee Pabl lo zho, bzhen̄ Pabl ti guietxtil, squi ndxie zho grë zho bdeed me xquizh lo Dios, dzigo beengroł me guietxtil co laa me psilo wagw.

³⁶ Dzigoraa peet güeyniedraa guic zho, ye zho laa zho psilo dow.

³⁷ Lo grë no zig zio no len̄ barcw co rgaa no chop gayoo tson̄gal̄tsiimtib.

³⁸ Blozhse bdioow no, dzigo laa zho blee grë zhobxtil ne zie len̄ barcw ga blaal̄ zhow lo nis, zeena gnitnë barcw spalal.

³⁹ Zeene laa liu blozh biini, gon grë zha ne rsëe barcw ga laa ti lë ro guidzliu rlu gax ga, per riend zho dien̄ paw. Natlaa nac ro guidzliu co, rlu zac gdziñ barcwa, nacne rëb zho dien̄ pe grielod gdziñnie zho barcw ga.

⁴⁰ Dzigo pchug zho doo ne zob guiib cruz nroob ne no len̄ nis ga, biaan̄se guiib co ga. Psilëe zho doo ne naaz yag nlag ne rchug nis rzë barcw, ni blisglaa zho lar nroob ne rcaan̄ me rzëw; zeena csëe mew gdziña gax ro guidzliu co.

⁴¹ Per ziese zho, lëetse lo yuzh ne zobli len̄ nis co güeytsiba, loxaque güeysëëbguica ga laa nëz zhitsa

psilo nobilaque, sac grëse nis ne rias riecaan choo co.

⁴² Dzigotaa laa grë men̄guiib co gocladz niut grë zha ne zie ga guey ladzguiib, rëb zho nend znuse xoobnis zho xoon zho.

⁴³ Per bdeete men̄ ne rnabey lo zho diidz, sac racladzd me gut zho Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co;

⁴⁴ laa grë zha ne gacd xoobnis, zac maase grë yag biats ne nobil̄ barcw xoobnisnie zho. Sca bdeeda diidz brieequia no ro nis grëse no.

28

Blëz zho Malt

¹ Zeene bdzin̄ no ga, dzigotaa gocndion̄ no lëe guidzliu win ne lë Malt ga.

² Grë miech ne no ga pquiadox zdoo zho no, bzëeg zho gui bredz zho no bdzëe no, sac lala rac nal̄ ni scataque bgaa no guie.

³ Ye Pabl güey güeytop chop lë yag ne cuib lo gui. Lëëtaaque laa me nodziiba lo gui, tibaque bias ti meel̄ ne zizhoon̄ lo zhindzëe gui co, pquiaalay ma nia me, quiataque ma ga.

⁴ Grë miech ne no ga, zeene gon̄ zhow rneechaa zho:

—iIse nagon̄ rlu, nzëeb men̄ qui ngutoo! Niicle blaa me lo nisdoo, per no guie_lwxtis ne quianab guet me.

⁵ Znuse bdzib Pabl nia me bron̄ me meel̄ co lo gui.

⁶ Grëse zho rwi quiambëz zho dien pa hor sigui me, te tibaque tso_{be} me liu ye guet me. Wdzee-laaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

⁷ Gaxaque ga quia tib lë liun men ne rnabey lo guidzliu win co lë Publ, dzigo bneedz me zaatne bliaaz no ga tson ngbidz ni bneedz me ncuaane bdioow no.

⁸ Lëëtaaque len dze co laa pxoz me nix rlan xlë ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac.

⁹ Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho.

¹⁰ Dzigo rleynie zho no, nroob grë ncuaane bgad zho lo no. Zeene gol dze ne laa no wbii ga, scasaque nroob ncuaane yquiin no nëz bneedz zho.

¹¹ Tson mëë bliaaz no lo guidzliu co, dzigo laa no brie_e ga bziaab no ti len xbarcw zha Alejandrí, ti barcw ne blëz ga dipse len mëë nal co. Guic barcw co quia chop mdio, mdio ne rnee zho Cástor ni mdio ne rnee zho Pólux.

¹² Bdziñ no guiedz Siracús, ga bliaaz no tson ngbidz.

¹³ Siracús brie_e no, gax gax ro guidzliu zio no bdziñ no guiedz Regio; biini liu ine zhoob ti me ne ziaadquia lo nis co, dzigo laa no brie_e Regio laa no zio. Biiniraa sti liu bdziñ no guiedz Puteoli,

¹⁴ ga bdziñ no lo blalaa zha ne riladz Jesús. Bnab zho lo no gbiaaz no, nacne bliaazaque no lo zho ga ti zmal. Garaa brie_e no bdziñ no Roma.

15 Grē zha ne riladzle Jesús Roma, zeene bin zho laa no gdziṅ ga, brieē zho biaad-xinēz zho no. Zhis zho biaddzieel no zaatne lē Foro de Apio, szhis zho biaad zaatne lē Tres Tabernas. Zeene gon Pabl scataa biaad-xinēz zho no, rley me rdeed me xquizh lo Dios.

Bdziṅ Pabl Roma

16 Zeene bdziṅ no lad guiedz Roma, bdeed zho diidz Pablzhal bguib ti yu ne blēz me grop me menḡuuiib ne quianap me, blood zho me ladzguuib.

17 Goc tsonṅ ngbidz bdziṅ no ga, dzigo bredz Pabl grē zha ne nac zha non lo zha Israel ne no ga. Blozhse pcaalsa zho, rēbchaa me lo zho:

—Laa naa bredz to nu gonṅ bets, gacnaṅ to ganle laa grē zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet beṅd naa lo zho, ni ti zhiwseed xmēṅgol ne bditsd naa.

18 Niicle wxtisgaaw, blozhse pquieṅp zho naa gon zho raapd naa falt, nacd naa zha ne rieḡuiaḡ guet; dzigo gocladz zho nsilaa zho naa.

19 'Per zeene gonṅ naa nēd menladz ne csilaa zho naa, nacne bnabaque naa ziaadnie zho naa lo César nu. Miṅ co nagonṅ nacne ziaḡ naa nu, ziaḡd naa cto naa menladz ne o cteedquiegaa naa zho.

20 Wen ne laa naa beenbey to nagonṅ, ni beenbeygaa to naa; gacnaṅ to sca ganle laa caden rii zob nia naa, per nacda por pe falt ne rap naa, sinque laaw zob nia naa porne riladz naa laa Dios pxeelle meṅ ne quiambēz menladz ne ga.

21 Dzigo pquiab zho rēb zho lo Pabl:

—¡Wlaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyuu pe guielntseeb.

²² Per na laga laa luu ziaad nu, siguiel luu sodiidz luu lo no dien zhapaa nac wseed ne rliladz luu i, sac blactaa zidzion no, zaatne notaa zha ne rliladza rlëenie miech zho.

²³ Dzigo pso zho ti dze ne tsie zho.

Zeene gol dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosa. Dipse dze sca bzodiidznie me zho grë min co.

²⁴ Brieequia bla zha ne bliladz grë mine bnee me ga, ni scaquegaa brieequia zha ne bliladzda.

²⁵ Grë zha ne riold zdoon mine rnee me ga, laa zho psilo noriee, nacne rëb me:

—Ib lëëpaa mine nac to i ga nagon bzeet Espiritu Sant, zeene psiaab me guic profet Isá znu rëb Isá

²⁶ lo grë xmen gol to:

Niicle peraa gon to, niicle peraa gan to,
per peet guien de to;

²⁷ sac gocntseeb zdoon to.

Zob diag to, ni peet ronde to;

zob lo to, ni peet ran de to.

Ncow nac guic to,

gane peet ronde to, peet ran de to;

niicle rioxcodgaa to gbig to lo naa zeena csilaa naa
to lo xtol to.

²⁸ Golgacnan sca ganle, min co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

²⁹ [Zee ne gon zho sca rëb Pabl mazdraa blëe zho, nodildiidzlsa zho laa zho zey.]

³⁰ Dipse len chop iz blëz Pabl ga, ga bree me ti len yu ne bio me. Ga rdzin grë miech ne zienee lo me,

³¹ zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

5317ca58-7555-5e4c-a420-e1e9210e2df2